

四庫全書

經部

欽定四庫全書

經部
春秋纂言卷十

詳校官鴻臚寺少卿臣梁景陽

給事中臣溫常綬獲勛

總校官進士臣繆琪

校對官中書臣王瓚

謄錄監生臣趙位堂

欽定四庫全書

春秋纂言卷十

元 吳澄 撰

昭公

名稠襄公妾齊歸之子在位三十二年夫人吳孟子

元年

庚申景王十四年○晉霸平十七年○蔡靈二年○曹武十四年○衛襄三年○鄭簡二十五年

○陳哀二十八年

○杞文九年○宋平三十五年

○齊景七年

○秦景三十六年○楚郕四年卒○

吳夷末

三年

春

王正月

公即位

叔孫豹會晉趙武楚公子圍齊國弱宋向戌衛齊
惡陳公子招蔡公孫歸生鄭罕虎許人曹人於虢

國弱公弱作酌後同齊惡公齊作石招常遠切罕
虎公罕作軒後同虢公作郭穀作郭○左傳曰尋
宋之盟也邾午謂趙文子曰宋之盟楚人得志於
晉今令尹之不信諸侯之所聞也子弗戒懼又如
宋子未之信稱於諸侯猶詐晉而駕焉況不信之
尤者乎楚重得志於晉晉之恥也文子曰宋之盟
子未有禍人之心武有仁人之心是楚所以駕於
晉也今武猶是心也楚又行僭非所害也武將信
以為本吾聞之能信不為人下吾不能自難楚不
為患楚令尹圍請用牲讀舊書加於牲上而已晉

人許之杜氏曰楚恐晉先歃故欲從舊書加於牲
上不歃血經所以不書盟讀舊書荆楚先晉而先
書趙武者張氏曰春秋正中外之分宋之盟楚爭
先而晉不與較今獮之役又以計讀書加牲上是
以蠻荒而爭勝也內外之分不可亂故二役皆先
趙武焉高氏曰此會乃楚公子圍帥諸侯之大夫
尋宋之盟也宋之盟齊人不預焉今齊又從楚矣
中國微弱可知也莒人弑君諸侯不共討之者是
時楚人方聽莒人之訴而欲執魯大夫是不以莒
人為可討也春秋不書莒人蓋斥之爾衛齊惡在
陳蔡之上
者上卿也

三月

取鄆

鄆公作運後同○左傳曰季武子伐莒取鄆
莒人告於會楚告於晉曰尋盟未退而魯伐

莒潰齊盟請戮其使樂桓子相趙文子欲求貨於叔孫而為之請使請帶焉弗與梁其蹇曰貨以藩身子何愛焉叔孫曰諸侯之會衛社稷也我以貨免魯必受師是禍之也何衛之為雖然季孫魯國何罪叔出季處有自來矣吾又誰怨然鮒也賄弗與不已召使者裂裳帛而與之曰帶其褊矣趙孟聞之曰臨患不忘國忠也思難不越官信也國忘死貞也謀主三者義也有是四者又可戮乎乃請諸楚曰魯雖有罪其執事不辟難畏威而敬命矣子若免之以勸左右可也不靖其能其誰從之魯叔孫豹可謂能矣請免之以靖能者子會而赦有罪又賞其賢諸侯其誰不欣焉望楚而歸之疆場之邑一彼一此何常之有主齊盟者誰能辯焉莒魯爭鄆為日久矣苟無大害於其社稷可無元也子其圖之楚人許之

夏

秦伯之弟鍼出奔晉

鍼其廉切。左傳曰：秦后子有寵於桓，如二君於景，其母

曰弗去，懼選鍼適晉，其車千乘。公羊傳曰：此仕於晉也。千乘之國而不能容其母弟，故謂之出奔也。胡氏曰：夫后子出奔，其父禍之而罪秦伯何也？春秋以均愛望人父，而以能友責人兄。父母有愛妾，猶終身敬之，不衰況兄弟乎？

六月

丁巳邾子華卒

悼公也在位十五年

晉荀吳帥師敗狄于太原

太原左作大鹵。左傳曰：晉中行穆子敗無終

及羣狄於大原崇卒也將戰魏舒曰彼徒我車所
遇又阨以付共車必免困諸阨又克請皆卒自我
始乃毀車以為行五乘為三伍為五陳以相離兩
於前伍於後專為右角參為左角偏為前拒以誘
之狄人笑之未陳而薄之大敗之穀梁傳曰中國
曰大原外域曰大鹵公羊傳曰此大鹵也謂之大
原地物從人也相氏曰大鹵大原晉陽縣胡氏曰
薄伐獫狁至於大原詩人笑之謂不窮追遠討及
封境而止也大原在禹服之內而狄人來侵攘斥
宜矣其過在毀車崇卒以詭誘狄人而敗之爾後
乘車戰法亡崇尚步卒以詐變相高皆此等格之
高氏曰書敗狄所以與中國之勝也箕與交剛之
役皆書人至是卿
帥師則晉益衰矣

秋

莒去疾自齊入于莒

去起呂切。左傳曰莒展與立而奪羣公子秩公子召去

疾於齊齊公子鉏納去疾孫氏曰莒子二子長去疾次展與莒子遇弒去疾奔齊展與立國人不與

程子曰去疾假齊之力以入莒討展與之罪正也故稱莒

莒展與出奔吳

展下公穀無與字。陸氏曰莒展與雖踰年猶不書爵高氏曰不稱

莒子聖人不與其為君也展與吳出也故奔吳程子曰展與為弒君者所立而亦以國氏何也號之會雖國亂未與然諸侯與其立矣故欲執叔孫也稱莒展與罪諸侯之與其立也

叔弓帥師疆鄆田

左傳曰因莒亂也趙氏曰凡疆田而書帥師皆有難也高氏曰

文十二年季孫行父嘗帥師而城之復為莒所取今乘莒之亂而取之又帥師以疆其田必帥師者

以不義得之懼不服也疆之者溝封之以別乎莒也劉氏曰譏以亂為利也

葬邾悼公

高氏曰入春秋來邾始書葬蓋邾滕薛小國也秦遠國也皆至昭公而書葬是

時魯衰甚矣小國如大國遠國如近國如

冬

十有一月

己酉楚子麇卒

麇公穀作卷口左傳曰楚公子圍將聘於鄭伍舉為介未出竟聞王

有疾而還伍舉遂聘公子圍至入問王疾縊而弑之遂殺其二子幕及平夏右尹子干出奔晉宮廐尹子哲出奔鄭殺太宰伯州犇于邾葬王於邾謂之邾教澄曰楚圍之欲弑逆而篡立也久矣邾教

有疾圍自外至入問其疾適值其卒因殺其君之
二子而自立國人遂疑麋之卒為圍所弑也夫子
別嫌明微以明其非弑圍之逆亂如仲遂之殺子
惡而已未嘗弑麋也呂氏曰經書楚子麋卒而左
氏以為公子圍弑之至誅慶封則左氏穀梁又載
慶封稱圍弑君之語後垂綠楚圍汰侈遂以為實
甚矣三傳之為經害也趙盾弑其君曰非盾也穿
也許止弑其君曰不嘗藥也鄭伯髡頑如會未見
諸侯而卒而曰子驷弑之也凡若
此類皆誣偽失實重為經害者也

楚公子比出奔晉

高氏曰靈王既殺其君之子而自立比為令尹力不能制亦不

從亂是以出奔春秋
書之為十三年起也

經書月四書日二大衍歷正月辛巳小乙酉冬至
閏月庚戌大二月庚辰小三月己酉大四月己卯

小五月戊申大經六月丁巳在此月六月戊寅大
七月戊申小八月丁丑大九月丁未小十月丙子
大十一月丙午小己酉四月十二月乙亥大長歷
是年閏十二月丁巳六月十一日己酉不在十一
月

二年

辛酉景王五年。晉霸平十八。蔡靈三。曹
武十五。衛襄四。鄭簡二十六。陳哀二十
九。杞文十。宋平三十六。齊景八。秦
景二十七。楚靈王虔元年。吳夷末四。

春

晉侯使韓起來聘

左傳曰韓宣子來聘且告為政
而來見高氏曰起韓厥次子也

襄七年韓厥老長子無忌有廢疾讓起為卿公新
即位晉不敢輕魯釋其奸盟取鄆而以貴卿來聘

焉

夏

叔弓如晉

左傳曰報宣子也

秋

鄭殺其大夫公孫黑

左傳曰鄭徐吾犯之妹美公孫楚聘之矣公孫黑又使疆

委禽焉犯懼告子產子產曰是國無政非子之患也唯所欲與適子南氏子皙怒既而橐甲以見子南欲殺之而取其妻子南知之執戈逐之及街擊之以戈子皙傷而歸告大夫曰我好見之不知其有異志也故傷大夫皆謀之子產曰直鈞幼賤有罪罪在楚也乃執子南放之于吳鄭伯及其大夫

盟于公孫段氏罕虎公孫僑公孫段印段游吉駟帶私盟於閨門之外實薰隧公孫黑彊與於盟使大史書其名且曰七子子產弗討鄭公孫黑將作亂欲去游氏而代其位傷疾作而不果駟氏與諸大夫欲殺之子產在鄆聞之懼弗及乘遽而至使吏數之曰伯有之亂以大國之事而未爾討也爾有亂心無厭國不女堪專伐伯有而罪一也昆弟爭室而罪二也薰隧之盟女矯君位而罪三也有死罪三何以堪之不逮死大刑將至再拜稽首辭曰死在朝夕無助天為虐子產曰人誰不死凶人不終命也不逮死司寇將至縊尸諸周氏之衢加木焉高氏曰黑則有罪而鄭人初畏其強不之討也今因其疾而幸勝之亦云殆矣故搆國以殺

冬

公如晉至河乃復

左傳曰韓須如齊送女齊陳無宇逆女致少姜少姜有寵於晉

侯謂之少齊少姜卒公如晉及河晉侯使士文伯來辭曰非伉儷也請君無辱孫氏曰公如晉至河乃復者六唯二十三年書有疾明有疾而反餘皆見距不納大取困辱也高氏曰公如晉而晉不納春秋以公至河乃復為文者臣子之心不欲其君見拒於人而以為公臨河而不濟懼涉難而自復也乃者有阻之辭公不以禮自重而自取輕辱於大國也且公得至晉是公得與乎國事也季氏不使公與國事故公不得至晉焉

季孫宿如晉

左傳曰公還季孫宿遂致服焉穀梁傳曰公如晉而不得入季孫宿如晉

而得入高氏曰以是知晉不納公季孫有以使之也

經書月無書日無大衍歷正月乙己小乙卯冬至
二月甲戌大三月甲辰小四月癸酉大五月癸卯
小六月壬申大七月壬寅小八月辛未大九月辛
丑小十月庚午大十一月庚子大十二月庚子小
三年 壬戌景王六年。晉霸平十九。蔡靈四。曹
武十六。衛襄五。鄭簡二十七。陳哀三十
紀文十一。宋平三十七。齊景九。
蔡景三十八。楚靈二。吳夷末五。

春

王正月

丁未滕子原卒

原公作泉。成公也。春
秋於滕至是三書其卒

夏

叔弓如滕

滕小國也而魯使卿往會其葬以我襄公之葬滕子來會故報之也

五月

葬滕成公

秋

小邾子來朝

左傳曰小邾穆公來朝季武子欲卑之穆叔曰不可曹滕二邾實不忘我

好敬以逆之猶懼其貳又卑一睦焉逆羣好也其如舊而加敬焉季孫從之高氏曰公即位之初大國來聘小國來朝非不可為之國也而終之以流播詩曰靡不有初鮮克有終可不戒哉

八月

大雩

冬

大雨雹

雨去聲

北燕伯欵出奔齊

左傳曰燕簡公多嬖寵欲去諸大夫而立其寵人燕大夫比以

殺公之外嬖公懼奔齊胡氏曰大夫國之陪貳晉屬公殺三卻立胥童而弑於匠麗氏漢隱帝殺楊史立郭允明而弑於趙村衛獻公蔑冢卿而信其左右亦奔夷儀故人主不尊陪貳而與賤臣圖柄臣者事成則失身而見弑事不成則失國而出奔此有國之大戒也

經書月三書日一大衍歷正月己亥大丁未九日庚申冬至二月己巳小三月戊戌大四月戊辰小

五月丁酉大六月丁卯小七月丙申大八月丙寅
小九月乙未大閏月乙丑小十月甲午大十一月
甲子小十二月癸巳大
長曆丁未正月十日

四年

癸亥景王七年○晉霸平二十○蔡靈五○曹
武十七○衛襄六○鄭簡二十八○陳哀三十
一○杞文十二○宋平三十八○齊景十
○秦景三十九○楚靈三○吳夷末六

春

王正月

大雨雹

電公校作雪○胡氏曰電者陰脅陽臣侵
君之象是時季孫宿襲位世卿弱公室數

月之間再有雹變申豐者季氏之孚
也不端言其事歸咎藏冰之失誣矣

夏

楚子蔡侯陳侯鄭伯許男徐子滕子頓子胡子沈

子小邾子宋世子佐淮夷會于申

左傳曰楚子使椒舉如晉求諸

侯晉侯欲勿許司馬侯曰晉楚唯天所相不可與爭君其許之乃許楚使楚子問於子產曰晉其許我諸侯乎對曰許君晉君少安不在諸侯其大夫多求莫匡其君在宋之盟又曰如一若不許君將焉用之王曰諸侯其來乎對曰必來不來者其魯衛曹邾乎曹邾畏宋邾畏魯魯衛偏於齊而覲於晉唯是不來諸侯如楚魯衛曹邾不會曹邾辭以難公辭以時祭衛侯辭以疾鄭伯先待于申椒舉言於楚子曰臣聞諸侯無歸禮以為歸今君始得諸侯其慎禮矣霸之濟否在此會也杜氏曰胡汝陰

縣西北有胡城張氏曰淮夷淮浦之夷後漢志下邳國有淮浦縣申姜姓之國在南陽宛縣程子曰晉平不在諸侯楚於是彊為霸者之事孫氏曰中國自宋之會政在大夫諸侯不見者十年楚子得大合諸侯於此者中國不振喪亂日甚幅裂橫潰自是天下之政中國之事皆荆楚制之至於平丘召陵之會諸侯雖再出尋復叛去事無所救不足道也高氏曰楚子會諸侯若尋宋之盟也謀異也圖霸也蓋中國自晉平始衰齊靈莊背之平公屢合諸侯以討焉襄二十五年莊公遇弒始與晉平晉侯自是不復出與盟會其大夫趙武為政不在諸侯故諸侯少安然而晉日以衰政在六卿楚子始求合諸侯而未定問於子產曰晉其許我乎又曰諸侯其來乎則靈王固自以為不足服諸侯而懼其未必從矣當是時使晉稍自彊其誰敢與爭晉彊而諸侯從之則楚亦不能肆其志也而晉方且溺於嬖寵故楚惺然得專諸侯諸侯舍

晉無所附亦不得已而從楚雖然楚之會諸侯也非與國則小國爾魯齊衛曹許鄆杞不會也宋鄭滕小鄆雖會而終不與也是知楚人必不能主中國也蔡人春秋以來常在陳衛之上自莊十六年之後以服屬於楚故未嘗一會而先陳衛者今楚子大合諸侯故復居陳之上

楚人執徐子

左傳曰徐子吳出也以為貳焉故執諸申高氏曰執之非道也蓋楚子亦

欲効桓文之舉以示威諸侯爾

秋

七月

楚子蔡侯陳侯許男頓子胡子沈子淮夷伐吳

左傳

曰楚子以諸侯伐吳宗太子鄭伯先歸宗華費遂鄭大夫從高氏曰諸侯畏楚之彊守宗之盟而從之然猶不能致魯衛曹薛邾杞至伐吳之役則中國之諸侯皆去唯楚屬從之爾人心之嚮背可知也

執齊慶封殺之

左傳曰使屈申圍朱方克之執齊慶封而盡滅其族將戮慶封椒舉

曰臣聞無瑕者可以戮人慶封唯逆命是以在此其肯從於戮乎播於諸侯焉用之王弗聽負之斧鉞以徇於諸侯使言曰無或如齊慶封哉其君弱其孤以盟其大夫慶封曰無或如楚共王之庶子圍弑其君兄之子麋而代之以盟諸侯王使逮殺之穀梁傳曰慶封其以齊氏何也為齊討也不以殺君罪之者慶封不為靈王服也張氏曰春秋書殺它國大夫之法有二凡有罪而當誅者書曰某

人殺某若楚人殺陳夏徵舒是也無罪而不服者
書執而殺之若執蔡世子有以歸用之楚人執行
人于徵師殺之是也慶封有與弒其君之罪楚子
殺之宜也不曰殺齊慶封而曰執齊慶封殺之者
楚靈有諸已而非諸人是以慶封不服而春秋不
純以討賊之法書之也高氏曰初崔杼弒齊君而
慶封為之黨齊人欲併討之慶封走之吳吳與之
朱方而居之楚子以慶封在吳至是會諸侯伐吳
為齊討執慶封而殺之假中國仁義以重其會所
以盜亦有道也殺夏徵舒殺陳孔奐不言執者直
辭也此先言執者曲辭也然執徐子稱楚人此執
慶封若不主於楚者不與楚討也陳背中國而屬
楚楚故得殺徵舒孔奐而討之今慶封得罪於中
國故聖人不與荆楚之討中國所以深罪中國之
不能自
正也

遂滅賴

賴公穀作厲。左傳曰：遂以諸侯滅賴。遷賴於鄢。楚子欲遷許於賴，使鬬韋龜與公

子奔疾城之而還。申無宇曰：楚禍之首將在此矣。召諸侯而來伐國，而克城竟莫校。王心不違民，其居乎民之不處，其誰堪之？不堪，王命乃禍亂也。高氏曰：楚人會中國之諸侯，又帥之以伐吳，專殺中國之大夫，遂以諸侯之兵滅人之國，流毒如此，蓋出於向戌弭兵之謀也。

九月

取鄢

左傳曰：莒亂，莒公立而不撫鄢。鄢叛而來，孫氏曰：襄六年，莒人滅鄢，蓋莒滅鄢以為附庸，今魯

取之

冬

十有二月

乙卯叔孫豹卒

左傳曰初穆子去叔孫氏及庚宗遇婦人使松為食而宿焉問其行

告之故哭而送之適齊娶於國氏生孟丙仲壬及宣伯奔齊魯人召之歸既立所宿庚宗之婦人獻以雉問其姓對曰余子長矣能奉雉而從我矣召而見之號之曰牛遂使為監有寵長使為政叔孫田於丘猶遂遇疾焉監牛欲亂其室殺孟逐仲疾急命召仲牛許而弗召杜洩見告之饑渴授之戈對曰求之而至又何去焉豎牛曰夫子疾病不欲見人使寘饋于下而退牛弗進則置虛命徹叔孫不食卒高氏曰穆叔質直好美博聞強識季文孟獻所不逮也然蔽於所習卒以餓死襄陵許氏曰叔孫豹卒而毀中軍則公若寄矣以是知豹之有力於公室所謂剝之無咎者歟

經書月四書日一天行歷正月癸亥大乙丑冬至
二月癸巳小三月壬戌大四月壬辰小五月辛酉
大六月辛卯小七月庚申大八月庚寅小九月己
未大十月己丑小十一月戊午大十二月戊子小
乙卯二十八日長歷是年閏
四月乙卯十二月二十九日

五年

甲子景王八年。晉霸平二十一。蔡靈六。
曹武十八。衛襄七。鄭簡二十九。陳哀三。
十二。杞文十三。宋平三十九。齊景十。
一。秦景四十卒。楚靈四。吳夷末七。

春

王正月

舍中軍

舍音捨。左傳曰：「平公室也。」初作中軍三
分公室而各有其一。季氏盡逐之。叔孫氏

臣其子弟孟氏取其半焉及其舍之也四分公室
李氏擇二二子各一皆盡征之而貢於公孔氏曰
初作中軍季氏盡征之並不入公室也叔孫氏臣
其子弟以一家之內有父子兄弟四品以父兄之
稅入公子弟之稅入己大率半屬公半入己孟氏
則於子弟中取其半或取子或取弟大率三分歸
公一分入己十二分其國民三家得七公得五國
民不盡屬公公室已卑矣今舍中軍四分公室三
家自取其稅而各貢于公公室彌卑矣初云作三
軍今不云舍三軍者初作時舊有二軍今更增一
軍人數不足故各毀其乘足成三軍今此則唯舍
中軍之衆屬上下二軍季氏因叔孫家禍退之使
同孟孫獨取其半為專己甚又擇取善者是專之
極故傳言擇二以見之高氏曰季氏欲乘叔孫之
弱而去之名曰復古竇欲自強爾
自是公室有貢而已無復有民矣

楚殺其大夫屈申

左傳曰楚子以屈申為貳於吳乃殺之以屈生為莫敖

公如晉

左傳曰晉侯謂女叔齊曰魯侯不亦善於禮乎自郊勞至于贈賄禮無違者對曰是

儀也不可謂禮也禮所以守其國行其政令無失其民者也今政令在家不能取也公室四分民食於他思莫在公不圖其終為國君難將及身不恤其所禮之本末將於此乎在而屑屑焉習儀以亟言善於禮不亦遠乎高氏曰公至是受三家之貢而已無復有民故雖如晉非季氏之所忌也

夏

莒年夷以牟婁及防茲來奔

高氏曰牟夷者展與之黨也公如晉未反

而魯受莒牟夷邑季氏專且見莒益弱矣書及者以防與茲別二邑也防本屬魯蓋嘗為莒所取今

遷吾所喪邑而與受叛邑同者不以私害公也杜氏曰防茲城陽平昌縣西南有防亭姑幕縣東北有茲亭張氏曰地譜密州安丘縣有平昌故城莒縣有姑幕故城

秋

七月

公至自晉

左傳曰莒人愬于晉晉侯欲止公范獻子曰曰不可人朝而執之誘也討不以師

而誘以成之情也為盟主而犯此二者無乃不可乎請歸之間而以師討焉乃歸公高氏曰歷二時乃得歸

戊辰叔弓帥師敗莒師于蚡泉

蚡扶粉切公作濟穀作賁○左傳曰

莒人來討不設備叔弓敗諸蚡泉高氏曰魯既受
莒叛邑莒人興師而來叔弓敗之曰敗莒師幸魯
之勝乃所以罪之也杜氏曰蚡
泉魯地張氏曰地譜東境之地

秦伯卒

景公也在位四
十年子哀公嗣

冬

楚子蔡侯陳侯許男頓子沈子徐人越人伐吳

左傳

曰四年冬吳伐楚入棘櫟麻以報朱方之役楚子
以諸侯及東夷伐吳以報棘櫟麻之役蓬射以繁
揚之師會於夏汭越大夫常壽過帥師會楚子于
瑣間吳師出蓬啓疆帥師從之遽不設備吳人敗
諸鵠岸楚子以駟至於羅汭吳子使其弟蹇由犒
師楚人執之楚師濟於羅汭沈尹赤會楚子次於

萊山遂射帥繁揚之師先入南懷楚師從之及汝
清吳不可入楚子遂觀兵於坻箕之山是行也吳
早設備楚無功而還以蹶由歸高氏曰往年伐吳
矣今又伐吳者吳不畏故也越於是始見徐己預
中國會盟唯前年從楚子會申又貳於吳而見執
於楚今又從以伐吳張氏曰越始見經姒姓其先
夏后少康之庶子封於越
杜氏曰越國會稽山陰縣

經書月二書日一大衍歷正月丁巳大庚午冬至
二月丁亥小三月丙辰大四月丙戌小五月乙卯
大六月乙酉大七月乙卯小戊辰十四日八月甲
申大九月甲寅小十月癸未大十一月癸丑小十
二月壬午大長歷
戊辰七月十五日

六年

乙丑景王九年。晉霸平二十二。蔡靈七。
魯武十九。衛襄八。鄭簡三十。陳哀三十。

春

三〇杞文十四卒〇宗平四十〇齊景十
二〇秦哀公元年〇楚靈五〇吳夷末八

王正月

杞伯益姑卒

文公也在位十四年其弟郁釐立是為平公

葬秦景公

秦於是始書葬

夏

季孫宿如晉

左傳曰拜莒田也高氏曰謝前年取莒牟夷叛邑蓋莒既伐魯則魯有辭

是以晉受季孫之聘而不見討也彌兵之時莒亦好合矣

葬杞文公

宗華合比出奔衛

左傳曰宗寺人柳有寵太子佐惡之華合比曰我殺之柳聞之

乃坎用牲埋書而告公曰合比將納亡人之族既盟於北郭矣公使視之有焉遂逐華合比合比奔衛襄陵許氏曰經書宗公殺其世子痤宗華合比出奔衛皆著奇人譏慝敗國以為世戒

秋

九月

大雩

楚薳罷帥師伐吳

罷公作頗。左傳曰徐儀楚聘于楚楚子執之逃歸懼其叛也

使蓬洩伐徐吳人救之令尹子蕩帥師伐吳師於豫章而次于乾谿吳人敗其師于房鍾獲宮廐尹棄疾子蕩歸罪于蓬洩而殺之高氏曰三書伐吳者見楚終不得志於吳也襄陵許氏曰敗楚師者非蓬洩也而洩伏其誅故書蓬罷伐吳以正之楚再不競於吳乃彌兵鋒有事陳蔡至復伐徐而國亂矣吳蓋自是休兵息民國始浸彊

冬

叔弓如楚

左傳曰聘且弔敗也高氏曰左氏以為弔敗非也楚恃彊暴雖敗猶諱之魯豈

敢弔乎蓋四年公不會申己而震楚兵威將朝楚而不能故以叔弓先聘而明年躬繼之也張氏曰楚與吳仇敵之國而昭公昏吳遠楚故申之會魯不與焉今楚復伐吳其惡益遠昭公非能以中國

自尊而遠夷狄者姑通好於楚蓋不待遂啓疆之召已服楚而將朝之矣

齊侯伐北燕

左傳曰齊侯如晉請伐北燕晉侯許之遂伐北燕將納簡公晏子曰不入

燕有君矣民不貳吾君賄左右諂諛作大事不以信未嘗可也

經書月二書日無大衍歷正月壬子小丙子冬至二月辛巳大三月辛亥小四月庚辰大五月庚戌小六月己卯大閏月己酉小七月戊寅大八月戊申小九月丁丑大十月丁未小十一月丙子大十二月丙午大長

歷是年閏六月

七年

丙寅景王十年○晉霸平二十三○蔡靈八○曹武二十○衛襄九年○鄭簡三十一○陳哀

三十四○杞平公郁釐元年○宋平四十一○齊景十三○秦哀二○楚靈六○吳夷末九

春

王正月

暨齊平

襄陵許氏曰襄公之世齊數伐魯至齊景公一使慶封來聘而不書魯報至是乃暨

齊平劉氏曰齊大魯小魯為齊弱久矣然而能以暨齊平者介於楚也夫不自計德之厚薄勢之利害而惜人之威以憑諸侯是以遠者不服近者不親昭公棄其國死於外諸侯莫之救也從此生矣

三月

公如楚

左傳曰楚子成章華之臺願與諸侯落之太宰蒍啓疆曰臣能得魯侯蒍啓疆來召

公辭曰昔先君成公命我先大夫嬰齊曰吾不忘先君之好將使衡父照臨楚國嬰齊受命于蜀我

先君共王引領北望日月以冀傳序相授於今四
王矣嘉惠未至唯襄公之辱臨我喪今君若步玉
趾辱見寡君寵靈楚國以信蜀之役是寡君既受
貺矣何蜀之敢望君若不來使臣請問行期寡君
將承質幣而見於蜀以請先君之既高氏曰楚靈
非彊君也數會諸侯焉皆其微者又且多叛而吳
人之聞未艾也亦奚庸必朝哉蓋晉平不能修文
公之業使我不能自安而玉帛駟馳歲不遑暇以
是知王室不綱而霸
主猶有功於諸夏也

叔孫婁如齊蒞盟

婁執畧切公作舍後同○襄陵
許氏曰始暨齊平故盟以結好

夏

四月

甲辰朔日有食之

秋

八月

戊辰衛侯惡卒

穀梁傳曰卿衛齊惡君衛侯惡何以君臣同名也君子不奪人名不

奪人親之所名重其所以來也澄曰襄公也在位九年庶子元嗣是為靈公

九月

公至自楚

自如楚今半年餘

冬

十有一月

癸未季孫宿卒

此季孫行父之子
武子也子統嗣

十有二月

癸亥葬衛襄公

高氏曰襄公之卒晉反戚田
王有追命可以蓋獻之愆也

經書月七書日四大衍歷正月丙子小辛己冬至
二月乙巳大三月乙亥小四月甲辰大朔日食五
月甲戌小六月癸卯大七月癸酉小八月壬寅大
戊辰二十七日九月壬申小十月辛丑大十一月
辛未小癸未十三日十二
月庚子大癸亥二十四日

八年

丁卯景王十一年○晉霸平二十四○蔡靈九
○曹武二十一○衛靈公元年○鄭簡三十二

○陳哀三十五卒。杞平二。○宋平四十二。
齊景十四。○秦哀三。○楚靈七。○吳夷末十。

春

陳侯之弟招殺陳世子偃師

左傳曰陳哀公元妃鄭姬生悼太子偃師

二妃生公子留下妃生公子勝二妃嬖留有寵屬諸司徒招與公子過哀公有廢疾公子招公子過殺悼太子偃師而立公子留澄按齊侯弟年鄭伯弟語皆非三命之卿特以其屬貴而同於再命之卿陳公子招既為三命之卿而以氏名通矣今又去其氏而曰陳侯之弟招何也蓋曰陳公子招殺陳世子偃師則見其挾叔父之尊而賊其兄之世嫡也

夏

四月

辛丑陳侯溺卒

哀公也在位三十五年高氏曰陳侯以廢疾不能討殺世子之賊因

自縊而死夫楚觀從納公子比而靈王縊春秋謂比弑其君陳侯之弟招立公子留而哀公縊春秋不謂留弑君何也比之立無君者也靈雖不縊亦不與比並存是靈王之死由比也招之立留由君之廢也且君有命哀雖不縊亦不可以君國是哀之死不以留也

叔弓如晉

左傳曰賀虎祁也鄭伯亦賀史趙曰甚哉其相蒙也可弔也而又賀之襄陵許

氏曰財費則國貧役煩則民敝此之謂可弔而諸侯賀之是以人君安於危亡而不自知蓋諛之者衆也當楚之隆勢專諸夏而晉弗慮圖唯宮室之崇以為安榮平公可謂卑矣高氏曰前年楚成章

華之臺召諸侯落之至是晉成虜祁之官而諸侯
遂皆往賀之晉之效尤如此霸業之不振宜哉

楚人執陳行人于徵師殺之

左傳曰于徵師赴于
楚且告有立君公子

勝愬之于楚楚子執而殺之劉氏曰
楚惡公子招而殺于徵師非其罪也

陳公子留出奔鄭

蘇氏曰楚將討陳故留出奔留
既爲君矣不曰陳留而曰陳公

子留何也留立於招爾未成爲君也高
氏曰偃師曰世子留曰公子別嫡庶也

秋

蒐于紅

左傳曰大蒐于紅自根牟至于商衡草車
千乘杜氏曰紅魯地沛國蕭縣西有紅亭

遠疑劉氏曰蒐春事也秋興之非正也蒐有常地
矣于紅亦非正也曷爲不言公公不得與於蒐爾

三家專魯而分之政
令出焉公寄食焉爾

陳人殺其大夫公子過

過古禾切○左傳曰陳公子招歸罪於公子過而殺

之澄曰按哀公屬留於招與過故招過同殺太子
二人之罪均也招畏國人公論懼楚人來討故歸
過於過而欲免
己人其可欺乎

大雩

冬

十月

壬午楚師滅陳

左傳曰楚公子棄疾帥師奉偃師
之子吳圍陳宋戴惡會之滅陳使

穿封戌
為陳公

執陳公子招放之于越

高氏曰公子招死有餘罪反宥而放之

殺陳孔奭

孫氏曰陳公子招殺世子之賊也而放之陳孔奭無罪之人也而殺之吁楚靈

暴虐淫刑如此澄曰孔奭招之黨不為無罪然招首惡也而放奭同惡也而殺刑頗矣

葬陳哀公

楚葬之也與齊侯滅紀而葬紀伯姬同不曰楚子葬者蒙上楚師滅陳之文而

書三事其執其放其殺其葬皆楚也

經書月二書日二大衍歷正月庚午大丙戌冬至
二月庚子小三月己巳大四月己亥小辛丑三日
五月戊辰大六月戊戌小七月丁卯大八月丁酉
小九月丙寅大十月丙申小十一月乙丑大經十

月壬午在此月十二月乙未小長歷是年閏八月辛丑四月四日壬午十月十八日

九年

戊辰景王十二年。晉霸平二十五。蔡靈十。曹武二十二。衛靈二。鄭簡三十三。陳

滅。杞平三。宋平四十三。齊景十五。秦哀四。楚靈八。吳夷末十一。

春

叔弓會楚子于陳

左傳曰叔弓宗華亥鄭游吉衛趙厲會楚子于陳杜氏曰楚子

在陳故四國大夫往不行會禮故不總書襄陵許氏曰楚既滅陳威震中夏是以無所號召而諸國會之大夫會之

許遷于夷

左傳曰楚公子弃疾遷許于夷實城父取州來淮北之田以益之杜氏曰許畏

鄭欲遷故以自遷為丈高氏曰陳滅許遷皆中國
無霸之故也杜氏諤曰許自成十五年遷于葉至
此又遷于夷春秋詳錄以
見許之危弱不能自守矣

夏

四月

陳災

災公穀作大○左傳曰鄭裨竈曰五年陳將
復封封五十二年而遂亡公羊傳曰陳已滅

矣其言陳災何存陳也胡氏曰凡外災告則書今
楚已滅陳夷於屬縣使穿封戌為公也必不使告
於諸侯言亡國之有天災也何以書於魯國之策
乎當是時叔弓與楚子會于陳則目擊其事矣雖
彼不來告此不往弔叔弓使畢而歸語陳故也魯
史遂書之爾高氏曰陳雖為楚所滅而土地居民

猶在焉聖人不與楚
滅之也故遷孫之陳

秋

仲孫矍如齊

矍俱縛切。左傳曰孟僖子如齊殷聘杜氏曰自叔老聘齊至今二十年

禮意久曠今脩盛聘以無忘舊好高氏曰此暨齊平之故也齊平而不來聘則著齊輕公非特居鄆時也其來久矣

冬

築郎囿

左傳曰季平子欲其速成也叔孫昭子曰焉用速成其以勸民也無囿猶可無民其

可乎襄陵許氏曰公內制於疆臣外輕於大國亂亡危辱兆矣是之弗慮而築郎囿知公之志日以

荒矣張氏曰此見季孫意如逢其君以耳目之娛而竊其權昭公安之而不悞也

經書月一書曰無大衍歷正月甲子大辛卯冬至二月甲午小三月癸亥大閏月癸巳小四月壬戌大五月壬辰小六月辛酉大七月辛卯大八月辛酉小九月庚寅大十月庚申小十一月己丑大十二月己未小

十年

己巳景王十三年○晉霸平二十六卒○蔡靈十一○曹武二十三○衛靈三○鄭簡三十四

○陳滅○杞平四○宋平四十四卒○齊景十六○秦哀五○楚靈九○吳夷末十二

春

王正月

夏

齊樂施來奔

齊公作晉。左傳曰：齊惠樂高氏皆著酒信內多怨，疆於陳鮑氏而惡之。

有告陳桓子曰：「子旗子良將攻陳鮑，亦告鮑氏桓子投甲而如鮑氏。」遭子良醉而騁，遂見丈子則亦授甲矣。使視二子，則皆將飲酒。桓子曰：「彼雖不信，聞我投甲則必逐我。」及其飲酒也，先伐諸陳鮑方睦，遂伐樂高氏。子良曰：「先得公陳鮑焉。」往遂伐虎門公卜，使王黑以靈姑鉅率吉請斷三尺焉。而用之戰于稷，樂高敗。又敗諸莊，國人追之又敗諸鹿門。樂施高彊來奔。高氏曰：「樂施與高彊以兵攻君，官欲伐君以伐陳鮑，遂與君戰不勝而來奔，此罪大矣。」春秋不書高氏，非卿故也。魯方通聘而受其奔亡之臣，非義也。

秋

七月

季孫意如叔弓仲孫貜帥師伐莒

意公作隱後同胡氏曰前己

舍中軍矣曷為猶以三卿並將乎季孫毀中軍四分公室擇其二二家各有其一至是季孫意如身為主將二子各帥一軍為之副則三軍固在其日舍之者特欲中分魯國之衆為己私爾以為復古則異矣襄公以來既作三軍地皆三家之土民皆三家之兵每一軍出各將其所屬而公室無預焉是知雖舍中軍而三卿並將舊額固存矣高氏曰是時魯間晉之衰故三卿帥師同伐莒欲一舉滅之而三卿擅以為己功也

戊子晉侯彪卒

平公也在位二十六年子夷嗣是為昭公

九月

叔孫婼如晉

左傳曰叔孫婼齊國弱宗華定衛北宮喜鄭罕虎許人曹人莒人邾人滕

人薛人杞人小邾人如晉葬平公也

葬晉平公

左傳曰既葬諸侯之大夫欲因見新君叔向辭之曰大夫之事畢矣而又命孤

孤斬焉在衰經之中其以嘉服見則喪禮未畢其以喪服見是重受弔也大夫將若之何皆無辭高

氏曰不及期而葬簡也

不書冬缺文

十有二月

甲子宗公成卒

成公作戌。平公也在位。四十年子佐嗣是為元公。

經書月四書日二大衍歷正月戊子大丁酉冬至
二月戊午小三月丁亥大四月丁巳小五月丙戌
大六月丙辰小七月乙酉大戊子四日八月乙卯
小九月甲申大十月甲寅大十一月甲申小十二
月癸丑大甲子十二日長
歷七月庚寅朔無戊子

十有一年

庚午景王十四年。晉霸昭公夷元年。○
蔡靈十二年。○曹武二十四。○衛靈四。○

鄭簡三十五。○陳滅。○杞平五。○宋元公佐元年。
○齊景十七。○秦哀六。○楚靈十。○吳夷末十三。

春

王二月

二月公作正月

叔弓如宋

彭氏曰卿共盟主之葬猶可言也卿共同列之葬非禮甚矣

葬宗平公

亦速葬也

夏

四月

丁巳楚子虔誘蔡侯般殺之于申

虔殺作乾。左傳曰楚子在申

召蔡靈侯靈侯將往蔡大夫曰王貪而無信唯蔡於憾今幣重而言甘誘我也不如無往蔡侯不可楚子伐甲而饗蔡侯于申醉而執之殺之刑其士七十人陸氏曰般弑君父之賊也誘而殺之何為

其不可乎楚子內利其國外託討罪故不許其誘而責其詐也夫以大國之力而討小國之逆當聲其罪而伐之倡大義於天下今乃誘而殺之雖曰討賊實取其國蔡侯之罪自不容誅楚子之惡亦已甚矣高氏曰蔡般弑逆之罪雖義當討而楚子亦弑逆之賊也以賊討賊何辨曲直况楚子非真治般志在滅蔡也故春秋書楚子虔蔡侯般同斥其名以見其罪同永嘉呂氏曰諸侯不生名卒則名失國則名爭國則名見滅則名衛侯燬滅邢漢儒有滅同姓名之說然諸侯之滅同姓者多矣何以獨名衛侯耶楚子虔誘蔡侯般謂其誘而殺之故名然楚子誘戎蠻子亦誘之也何以不名說者曰以詐術誘荆蠻猶可以詐術誘中國不可然聖人書誘所以著楚子之罪矣豈以中外之故而有異乎然則衛侯燬楚子虔之所以名皆衍字爾或謂衛侯燬滅邢之下有衛侯燬卒因此而訛遂於

滅邢之上亦加燬字楚子虔亦恐後儒於蔡侯般之上見其不應名般而不名虔故加一虔字不知蔡侯般之名非以罪般也此與胡子髡沈子逞徐子章羽沈子嘉胡子豹蔡世子有潞子嬰兒同一例爾

楚公子棄疾帥師圍蔡

左傳曰韓宣子問於叔向曰楚其克乎對曰克哉蔡

侯獲罪於其君而不能其民天將假手於楚以斃之何故不克然胥聞之不信以幸不可再也楚王奉孫吳以討於陳曰將定而國陳人聽命而遂縣之今又誘蔡而殺其君以圍其國雖幸而克必受其咎弗能久矣高氏曰楚滅陳易滅蔡難此書圍蔡者般出會而世子有守尚能有拒且望中國諸侯之救也

五月

甲申夫人歸氏薨

襄公之妾昭公之母胡女歸姓

大蒐于比蒲

高氏曰脩楚故也曰大云者僭天子之制也十年書蒐此書大蒐見三家

蓋疆而車徒曰衆也大蒐雖素定然公以夫人之喪不自臨也而大蒐不廢則是三家者以馳騁田獵間君喪也張氏曰比蒲魯南鄙之地胡氏曰君有重喪喪不二事簡車徒非禮也乃有身從金革而無避者獨何與曰有門庭之冠宗廟社稷之存亡係焉必從權制伯禽服喪徐免並興至於東郊出戰之師與築城之役同日並舉度緩急輕重蓋有不得已焉者矣晉王克用蒐梁兵壓境而莊宗決勝於夾寨周太祖殂契丹入寇而世宗接戰於高平若此者君行為顯親非不顧也臣行為愛君

非不忌也唯審於輕重緩急之宜斯可矣登
按伯禽之以喪服從戎者服武王之喪也

仲孫獲會邾子盟于祲祥

祲祥公作侵芊○左傳曰修好禮也杜氏曰盟

會以安社稷故喪盟謂之禮趙氏曰春秋盟會是
常何獨於有喪之時而稱得禮是時又無大患邾
又小國何能有救患之益高氏曰始也公及邾儀
父盟于蔑公及邾儀父盟于趯是魯侯親與之盟
會也今公雖以夫人之喪使仲孫獲會邾子盟于
祲祥然自是仲孫何忌及邾子盟于援叔孫州仇
仲孫何忌及邾子盟于句澤是吾大夫與其君盟
會爾然則魯邾之更為強弱斷可知矣雖與邾盟
以脩好然魯人之志必欲滅
邾而後已此盟宜可信邪

秋

季孫意如會晉韓起齊國弱宗華亥衛北宮佗鄭

罕虎曹人杞人于厥慙

厥慙公作屈銀慙魚敬切又平聲。左傳曰謀救蔡

也。楚師在蔡。晉荀吳謂韓宣子曰：「不能救陳，又不能救蔡，物以無親。」晉之不能亦可知也。已為盟主而不恤亡國將焉用之？晉人使狐父請蔡於楚。弗許。襄陵許氏曰：「蔡能嬰城堅不下，楚此易助也。」厥慙，合天下之兵，畏不敢救，遣使請命，示之不能使楚益驕，有以量中國之力而卒取之，此韓起之罪也。

九月

己亥葬我小君齊歸

左傳曰：「公不感晉士之送葬者，歸以語史趙。史趙曰：『必為』」

魯郊叔向曰魯公室其卑乎君有大喪國不廢蒐
有三年之喪而無一日之感國不恤喪不忌君也
君無感容不顧親也國不
忌君君不顧親能無卑乎

冬

十有一月

丁酉楚師滅蔡

高氏曰楚子滅陳蔡皆稱師者著
其無道恃衆彊滅之也四月圍而

十有一月方滅者
世子有之力也

執蔡世子有以歸用之

有穀作友。高氏曰滅國
而用世子有者怒其拒師

之久也用之者以為牲也夫蔡本中國之諸侯乃
背中國而即荆楚必以荆楚為可恃也今蔡侯既

為荆楚所誘而殺之又從而滅其國其世子有又為所執而虐用之以絕其世然則荆楚何補於蔡哉此萬世人君之戒也蔡侯已死而有稱世子何也未得乎立也般誘殺則外亂國被圖則內急喪桓未至則世子固未得乎立矣而能拒狂楚者三時不改真所謂世子也不言以世子有歸者有不從楚故也斯得古人不共戴天之義也楚子誘人君而殺之乘人之喪而滅之執其嫡嗣而歸用之此楚子不道之甚聖人所以詳錄之非專罪楚子也乃所以罪吾中國王綱既墜霸統又絕諸侯莫敢救致荆蠻之自恣一至於此也

然則向成之謀實何利於中國哉

經書月五書日四大衍歷正月癸未小壬寅冬至二月壬子大三月壬午小四月辛亥大丁巳七日五月辛巳小甲申四日六月庚戌大七月庚辰小八月己酉大九月己卯小己亥二十一日十月戊

申大十一月戊寅小丁酉二十
日十二月丁未大閏月丁丑大

十有二年

辛未景王十五年。晉霸昭二。蔡滅。○
曹武二十五。衛靈五。鄭簡三十六卒。

○陳滅。○杞平六。○宋元二。○齊景十八。
○秦哀七。○楚靈十一。○吳夷末十四。

春

齊高偃帥師納北燕伯于陽

○北燕伯下一有欽字。
○左傳曰因其衆也。

杜氏曰言因唐衆欲納之故得先入唐不言于燕
未得國都也陽即唐也燕別邑中山有唐縣高氏
曰三年北燕伯出奔齊六年齊將納之而不果歟
播越在外蓋十年矣不能自復而藉齊之力僅能
納之於別邑而已
失國之難反如此

三月

壬申鄭伯嘉卒

簡公也在位三十六年子寧嗣是為定公高氏曰鄭去中國即楚久

矣至於簡公乘晉悼之方興以國反正遂息諸侯之兵子產相之薰然慈仁民蒙其澤蔚為春秋之

賢諸侯

夏

宋公使華定來聘

左傳曰通嗣君也高氏曰公始以卿共平公之葬故宋元公即

位而使人來聘也

公如晉至河乃復

穀梁傳曰季孫氏不使遂乎晉也左傳曰取鄭之役莒人愬于

晉晉有平公之喪未之治也故辭公公子慈遂如晉高氏曰晉昭公嗣位公往朝焉公四如晉皆至河乃復

五月

葬鄭簡公

三月而葬連

楚殺其大夫成熊

熊公作然穀作虎○左傳曰楚子謂成虎若教之餘也遂殺之

或譖成虎於楚子成虎知之而不能行懷寵也

秋

七月

冬

十月

公子慙出奔齊

慙魚親切公作整。左傳曰季平子立而不禮於南蒯南蒯謂子仲

吾出季氏而歸其室於公子更其位我以費為公
臣子仲許之叔仲小南蒯公子慙誅季氏慙告公
而遂從公如晉南蒯以費叛如齊子仲還及衛間
亂逃介而先及郊聞費叛遂奔齊高氏曰季氏之
臣南蒯將去季氏而立慙不克而以費叛
慙遂奔齊是以君子譏其妄而哀其志也

楚子伐徐

左傳曰楚子狩於州來次于潁尾使蕩
侯潘子司馬督囂尹午陵尹喜帥師圍

徐以懼吳楚子次于乾谿以為之援高氏曰徐吳
之姻國也楚人疾吳故遷怒於徐既執其君又伐

其國也

晉伐鮮虞

左傳曰晉荀吳偽會齊師者假道於鮮虞遂入昔陽滅肥以肥子縣皐歸伐鮮

虞因肥之役也杜氏曰不書將帥史闕文鮮虞白狄別種在中山新市縣昔陽肥國都樂平沾縣東有昔陽城肥白狄也縣皐其君名鉅鹿下曲陽縣西有肥累城高氏曰楚靈不道既滅陳蔡今方伐徐晉為盟主坐視而不救徐非力不能棄中國也

經書月四書日一大行歷正月丁未小旦曰冬至二月丙子大三月丙午小壬申二十七日四月乙亥大五月乙巳小六月甲戌大七月甲辰小八月癸酉大九月癸卯小十月壬申大十一月壬寅小十二月辛未大長歷是年閏正月三月無壬申

十有三年

壬申景王十六年。晉霸昭三。蔡平公廬元年。曹武二十六。衛靈六。鄭定

公寧元年。陳惠公吳元年。杞平七。宋元三。齊景十九。秦哀八。楚靈十二。弒。吳夷末

五十

春

叔弓帥師圍費

左傳曰叔弓圍費弗克敗焉平子怒令見費人執之以為囚俘治臣

夫曰非也若見費人寒者衣之饑者食之為之令主而共其乏困費來如歸南氏亡矣民將叛之誰與居邑若憚之以威懼之以怒民疾而叛為之聚也若諸侯皆然費人無歸不親南氏將焉入矣平子從之費人叛南氏陸氏曰凡家臣以邑叛悉不書叛但書大夫圍之則邑叛可知矣高氏曰費季

氏邑也叔弓帥師圍之見家臣之彊季氏之無君也家臣以邑叛不以君命而使大夫討之如是則大夫非魯之大夫也季氏之大夫也師非魯之師也季氏之師也如是而欲討南蒯不思之甚矣

夏

四月

楚公子比自晉歸于楚弑其君虔于乾谿

○乾音干左傳

曰楚蒍氏之族及蒍居許圍蔡消蔓成然皆王所不禮也因羣喪職之族啓越大夫常壽過作亂圍固城克息舟城而居之觀起之死也其子從在蔡事朝吳曰今不封蔡蔡不封矣我請試之以蔡公之命召子干子皙及郊而告之情彊與之盟入襲蔡蔡公將食見之而逃觀從使子干食炊用牲加

書而速行己徇於蔡曰蔡公召二子將納之與之盟而遣之矣將師而從之蔡人聚將執之辭曰失賊成軍而殺余何益乃釋之朝吳曰二子若能死亡則如違之以待所濟若求安定則如與之以濟所欲且違上何適而可衆曰與之乃奉蔡公召二子而盟於鄧依陳蔡人以國楚公子比蔡公召肱公子棄疾蔓成然蔡朝吳帥陳蔡不羹許葉之師因四族之徒以入楚及郊蔡公使須務年與史狎先入因正僕人殺太子祿及公子罷敵公子比為王公子黑肱為令尹次于魚波公子棄疾為司馬先除王宮使觀從從師於乾谿而遂告之且曰先歸復所後者剝師及訾梁而潰王聞羣公子之死也自投于車下曰人之愛其子也亦如余乎侍者曰甚焉小人老而無子知擠於溝壑矣王曰余殺人子多矣能無及此乎右尹子革曰請侍於郊以聽國人王曰衆怒不可犯也曰若入於大都而

乞師於諸侯王曰皆叛矣曰若亡於諸侯以聽大國之圖君也王曰大福不再祇取辱焉然丹乃歸於楚王泓夏將欲入鄢郢尹無宇之子申亥求王遇諸棘園以歸王縊於芋尹申亥氏公羊傳曰楚靈王為無道作乾谿之臺三年不成百姓苦之諸侯怨之公子棄疾主方城之外以君陳蔡脅比而立焉然後令于乾谿之役曰比已立矣先歸者復其田里後者剝衆潰而散靈王經而死蘇氏曰比將為君不曰楚比而曰公子比何以比之歸非其謀也亂始於觀從而成於棄疾以比為名而已比迫於觀從而以身許之以致度死則比雖不弑而弑君之名比尸之矣比之歸也度猶在楚其不曰入何也觀從召之蔡人與之楚人不拒則比之歸無難也高氏曰先言比歸者明在外本無弑君之心也及其以棄疾之請也遂有得位之心故復言弑者正比之罪也既曰歸於楚又曰弑於乾谿者

非比親弑之也加之罪爾初楚子麋疾靈王因殺其子而自立公子比以是出奔晉比在晉十年矣其能一旦自外歸而弑其君乎蓋靈王無道雖棄疾脅比而立靈王自縊而死若比不從棄疾之脅則靈王未必死以此言之棄疾不得比之勢則無以濟其亂比見利而動遽欲為君則成楚靈之縊者乃比也蓋是時比當効死不立而既立矣又焉得避是名哉若使人之受其名也已享其利則後世姦人苟有藉口以濟其私者莫不皆寘力焉故聖人正名比之弑君所以絕後世姦人之禍也杜氏曰乾谿在熊國城父縣東竟

楚公子棄疾殺公子比

左傳曰觀從謂子干曰不殺棄疾雖得國猶受禍也

子干曰余不忍也子玉曰人將忍子國每夜駭曰王入矣棄疾使周走而呼曰王至矣國人大驚使

蔓成然走告子干子晳曰王至矣國人殺君司馬
將來矣君若早自圖也可以無辱又有呼而走至
者曰衆至矣二子皆自殺棄疾即位名曰熊居葬
子干于訾實訾教張氏曰公子比已為王棄疾為
司馬則君臣之分未定而棄疾誦殺之也不以弑君
書者君臣之分未定而棄疾誦殺之也比不能効
死不立而貪為君之利不得不服首惡之罪若夫
分未正而以誦殺之於曖昧之中目之以兩下相
殺可矣未可謂之殺君也高氏曰比復稱公子而
不以討賊之辭加之者非討賊也殺而代之也憫
比墮棄疾之謀以深罪棄疾也棄疾本圖位而脅
立比比既立遂殺而篡之比既死遂自立改名曰
居蓋弑君之人名在諸侯之策故公
子圖改名曰虔公子棄疾改名曰居

秋

公會劉子晉侯齊侯宋公衛侯鄭伯曹伯莒子邾

子滕子薛伯杞伯小邾子子平丘

左傳曰晉成虎初諸侯朝而歸

者皆有貳心為取鄭故晉將以諸侯來討叔尚曰諸侯不可以不示威乃並會告於吳晉侯會吳子於良水道不可吳子辭乃還治兵於邾南甲車四千乘遂合諸侯於平丘晉人將尋盟齊人不可晉侯使叔尚告劉獻公曰抑齊人不盟若之何對曰盟以底信君苟有信諸侯不貳何患焉告之以文辭董之以武師雖齊不許君庸多矣天子之老請帥王賦元戎十乘以先啓行遲速唯君叔尚告於齊曰諸侯求盟已在此矣今君弗利寡君以為請對曰諸侯討貳則有尋盟若皆用命何盟之尋叔尚曰明王之制使諸侯歲聘以志業間朝以講禮再朝而會以示威再會而盟以顯昭明志業於

好講禮於等示威於衆昭明於神自古以來未之或失也晉禮主盟懼有不治秦承齊儀而布諸君求終事也君曰余必廢之何齊之有唯君圖之寡君聞命矣齊人懼對曰小國言之大國制之敢不聽從叔向曰諸侯有間矣不可以不示衆治兵建而不飾復飾之諸侯畏之高氏曰霸圖不競久矣晉主夏盟諸侯皆貳平丘之會諸侯之衆兵車之盛奕世未覩又有天子之使以臨之使晉之威靈少振而聳動吳楚此叔向之謀也張氏曰平丘今開封府封丘縣在東漢志尚為平丘縣

八月

甲戌同盟于平丘

甲戌穀作庚戌○左傳曰齊服也孫氏曰自宋之會諸侯不出

大夫專會者十年至申之會則又甚矣楚子以蠻荒之衆橫行中國戕滅陳蔡以厭其欲諸侯莫敢

伉楚子專盟會者又十年矣今晉昭一旦與劉子合諸侯同盟於此者其能與楚子伉乎乘楚靈弑逆之禍爾高氏曰晉若果能與劉子大合諸侯以討楚平弑逆之罪亦足以彊中國之威矣今但同盟於此何所為哉雖然楚人自是不入寇而中國為之少安亦由此盟也

公不與盟

左傳曰邾人莒人愬於晉曰魯朝夕伐我幾亡矣我之不共魯故之以晉侯不

見公使叔向來辭曰諸侯將以甲戌盟寡君知不得事君矣諸君無勤子服惠伯對曰君信蠻夷之訴以絕兄弟之國棄周公之後亦唯君寡君聞命矣叔向曰寡君有甲車四千乘在雖以無道行之必可畏也況其率道其何敵之有牛雖瘠饋於豚上其畏不死南蒯子仲之憂其庸可棄乎若奉晉之衆用諸侯之師因邾莒杞鄆之怒以討魯罪問其二憂何求而弗克魯人懼聽命高氏曰此晉侯

聽邾莒之訴而辱公使不得與盟也夫晉侯與公同體當同心同力以復霸業而諸侯咸會乃聽邾莒之妄訴與衆棄公不以比數孫氏曰與公同事而不同盟非所以宗諸侯也天下孰不解體故自是訖會召陵諸侯復不出者二十四年至如郭陵之會晉自不出其不足以宗諸侯矣

晉人執季孫意如以歸

左傳曰晉人執季孫意如以幕蒙之使狄人守之司

鐸射懷錦奉壺飲冰以蒲伏焉守者御之乃與之錦而入晉人以平子歸子服湫從胡氏曰魯自文公以來公室微弱三家專魯而季氏罪之首也宿及意如尤為彊逼不臣晉人若按邾莒有無之狀究南蒯子仲奔叛之因告於諸侯以其罪執之請於天子以大義廢之選於魯卿更意如之位收斂私邑為公室之民使政令在君三家臣順今徒以邾莒之故執意如則是意在貨財而不責其無君

臣之義也澄按胡氏之論可謂萬世之大義矣而非當時之事情也錄之者以示教云爾

公至自會

公雖不與同盟然己與平丘之會矣故以會至

蔡侯廬歸于蔡

左傳曰平王即位陳蔡皆復隱太子之子廬歸於蔡杜氏曰隱太子

太子有也廬蔡平侯

陳侯吳歸于陳

左傳曰悼太子之子吳歸於陳杜氏曰悼太子偃師也吳陳惠公澄

按魯昭公八年正月陳哀公之弟公子招殺世子偃師哀公繼而死九月楚公子棄疾率偃師之子吳圍陳十月滅之使穿封為陳公十一年四月楚靈王誘蔡靈侯殺之公子棄疾帥師圍蔡十一月滅之執蔡世子有以歸用之楚城陳蔡不羹使棄疾為蔡公問於申無宇曰棄疾在蔡何如對曰

鄭莊公城櫟。寘子元焉。使昭公失位。臣間五大不在邊。五細不在庭。未大必折尾。大不掉。君所知也。至是年棄疾。果以陳蔡叛。陳蔡之人以復讎之故而樂從之。棄疾因此得國。故復陳蔡以報其功也。陳先聖之後。蔡王室之親。楚靈無道。滅其國而有其土地。廬蔡靈之孫吳陳哀之孫當為君者也。土地雖入楚國。固其國也。侯固其位也。故其復國也。書國書爵書名。如失國之君歸其國。然蓋陳蔡乃天子所封之國。非楚所得滅也。常山劉氏曰。陳蔡者先王之建國。非楚可滅。非楚可復也。故書爵書歸言二國之嗣位。其所固有。國其所宜歸也。二君名者素非諸侯。至此始立也。高氏曰。楚靈不道。暴滅陳蔡。而平王始依陳蔡之國。藉以發難。今既得位。遂復二國之後。暴靈之惡而歸恩於己。以說中國。春秋不言歸自楚者。見二國之復乃自當復。非外域得滅而復之也。廬靈公少子世子有之弟先。

儒謂世子有
之子非也

冬

十月

葬蔡靈公

陸氏曰國復乃葬
凡三十有一月

公如晉至河乃復

左傳曰公如晉荀吳謂韓宣子曰諸侯相朝講舊好也執其卿

而朝其君有不好焉不如辭之乃使士景伯辭公
子河高氏曰晉不與公盟今又執吾卿而公復朝
之無恥甚矣豈欲因晉之執而請討季
氏之罪乎然季氏在晉宜其不見納也

吳滅州來

左傳曰吳滅州來楚令尹子旗請伐吳
王弗許曰吾未撫民人未事鬼神未修

守備未定國家而用民力敗不可悔州來在吳猶在楚也子姑恃之高氏曰成六年吳入州來蓋本楚屬也至是取之盡殺其吏民無道之甚故稱滅焉春秋詳楚伐吳畧吳伐楚而志其甚者滅州來是也吳人以州來封季子之後入以遷蔡焉

經書月三書日一大衍歷正月辛丑小壬子冬至二月庚午大三月庚子小四月己巳大五月己亥大六月己巳小七月戊戌大八月戊辰小甲戌七日九月丁酉大十月丁卯小十一月丙申大十二月丙寅小

十有四年

癸酉景王十七年。晉霸昭四。蔡平二。○曹武二十七卒。○衛靈七。○鄭定二。○

陳惠二。○杞平八。○宋元四。○齊景二十。○秦哀九。○楚平王居元年。○吳夷末十六。○

春

意如至自晉

左傳曰季孫猶在晉子服惠伯私於中行穆子曰魯事晉何以不如夷之

小國魯兄弟也土地猶大所命能具若為夷棄之使事齊楚其何瘳於晉穆子告韓宣子且曰楚滅陳蔡不能救而為夷執親將焉用之乃歸季孫惠伯曰寡君未知其罪合諸侯而執其老若猶有罪死命可也若曰無罪而惠免之諸侯不聞是逃命也何免之為請從君惠於會宣子患之使叔魚見季孫曰紂也聞諸吏將為子除館於西河平子懼先歸惠伯待禮孫氏曰大夫執則至至名不稱氏也前見也

三月

曹伯滕卒

武公也在位二十七年其子頃嗣是為平公

夏

四月

秋

葬曹武公

八月

莒子去疾卒

去上聲。左傳曰莒著丘公卒郊公不感國人弗順欲立著丘公之弟庚

與郊公惡公子鐸而善於意恢公子鐸因蒲餘侯而與之謀曰爾殺意恢我出君而納庚與許之襄

陵許氏曰昭公以來微國皆葬而莒著丘公不葬者莒卒無謚棄周禮也是以春秋不書也

冬

莒殺其公子意恢

左傳曰蒲餘侯茲夫殺莒公子意恢郊公奔齊公子鐸逆庚與

於齊齊隰黨公子鉏送之有賂田澄按小國之卿再命書名其大夫一命但當書人意恢不稱大夫則是不命之士其名載於策者以其屬為公子則貴而同於再命之卿故於公予之下書名也

經書月三書日無大衍歷正月乙未大丁己冬至二月乙丑小三月甲午大四月甲子小五月癸巳大六月癸亥小七月壬辰大閏月壬戌小八月辛卯大九月辛酉大十月辛卯小十一月庚申大十二月庚寅小

十有五年

甲戌景王十八年○晉霸昭五○蔡平三○曹平公頌元年○衛靈公八年○鄭定三○

陳惠三○杞平九○宋元五○齊景二十
一○秦哀十○楚平二○吳夷末十七卒

春

王正月

吳子夷末卒

夷末公作夷昧夷末
在位十七年庶弟僚立

三月

癸酉有事于武宮籥入叔弓卒去樂卒事

○去上聲
左傳

日將禘於武公戒百官梓慎曰吾見赤黑之祲非
祭祥也喪氣也其在泄事乎叔弓泄事籥入而卒

高邠孫氏曰武宮廢廟也成六年復立之胡氏曰有事於宗廟聞大夫之喪則去樂而祭可乎按曾子問君在祭不得成禮夫子語之詳矣而無有及大臣者是知祭而去樂不可也有事於宗廟遭大夫之變則可以聞乎按禮衛太史柳莊寢疾君曰若疾亟雖當祭必告是知祭而以聞不可也禮莫重於當祭大夫有變而不以聞則內得以盡其誠敬之心於宗廟外得以全其隱恤之意於大臣是兩得之也然則有事於宗廟大臣蒞事篇入而卒於其所則如之何禮雖未之有可以義起也有事於宗廟大臣蒞事篇入而卒於其所去樂卒事其可也緣先祖之心見大臣之卒必間樂不樂緣孝子之心視已設之饌必不忍輕徹故去樂而卒事其可也宗廟合禮者常事不書苟以為可則春秋何書乎此記禮之變而書之者也澄曰叔子叔光之子也

夏

蔡朝吳出奔鄭

朝吳下公無出字朝作昭。左傳曰楚費無極害朝吳之在蔡也欲

去之乃謂之曰王唯信子故處子於蔡子亦長矣而在下位辱必求之吾助子請又謂其上之人曰王唯信吳故處諸蔡二三子莫之如也而在其上亦難乎弗圖必及於難蔡人逐朝吳朝吳出奔鄭王怒曰余唯信吳故寘諸蔡且微吳吾不及此女何故去之無極對曰臣豈不欲吳然而前知其為人之異也吳在蔡蔡必速飛去吳所以翦其翼也胡氏曰朝吳蔡之忠臣雖不能存蔡而能復蔡其從於棄疾以棄疾必能封之也棄疾以其忠於舊君而信之使居舊國可謂知所信矣則曷為出奔費無極害其寵也無極楚之讎人也出朝吳出蔡侯喪太子建殺連尹奢屏王耳目使不聰明卒

使吳師入郢辱及宗廟諍人為亂可不畏乎志朝吳出奔而入郢之師兆矣

六月

丁巳朔日有食之

秋

晉荀吳帥師伐鮮虞

左傳曰圍鼓克之以鼓子薦鞮歸高氏曰十二年伐之未

服故然僅能得鼓而卒叛去晉之不能遠畧可知矣

冬

公如晉

左傳曰平丘之會故也澄按平丘之會公不與盟大夫被執公既往朝而不見納辱

亦甚矣至此又往朝焉蓋畏大國不敢以辱為恥也

經書月三書日二大衍歷正月己未大癸亥冬至
經二月癸酉在此月二月己丑小三月戊午大四
月戊子小五月丁巳大朔日食經書六月食蓋置
閏後失也六月丁亥小七月丙辰大八月丙戌小
九月乙卯大十月乙酉小十一月甲寅大十二
月甲申大長歷是年閏九月癸酉二月十五日

十有六年

乙亥景王十九年○晉霸昭六年○蔡平
四○曹平二○衛靈九○鄭定四○陳惠

四○杞平十○宋元六○齊景二十二
○秦哀十一○楚平三○吳僚元年

春

齊侯伐徐

左傳曰齊師至於蒲隧徐人行成徐子
及邾人莒人會齊侯盟於蒲隧略以甲

父之舅叔孫昭子曰諸侯之無伯害哉齊君之無道也興師而伐遠方會之有成而還莫之亢也無伯也夫襄陵許氏曰景公之時吳楚方爭晉既不

能遠畧以齊之疆務德修政以通天下之志糾合

諸侯復霸可也而區區務爭徐伐莒之利志亦卑矣

楚子誘戎蠻子殺之

蠻公作蔓後同○左傳曰楚子聞蠻氏之亂也與蠻子之

無質也使然丹誘戎蠻子嘉殺之遂取蠻氏杜氏曰河南新城縣有蠻城張氏曰今伊闕縣即新城也蘇氏曰楚子誘蔡侯殺之名而書地以詐術害中國疾之也誘殺戎蠻不名不地其類相殘畧之也

夏

公至自晉

胡氏曰昭公數朝於晉三至於河而不得入兩得見而晉侯又欲討其罪而不

旃其困辱亦甚矣昭公安於危辱無激昂勉厲之意所謂自棄者不可與有為不亦悲乎

秋

八月

己亥晉侯夷卒

昭公也在位六年其子去疾嗣是為頃公

九月

大雩

季孫意如如晉

卿共葬事畏晉也

冬

十月

葬晉昭公

三月而葬速

經書月三書日一大衍歷正月甲寅小戌辰冬至
二月癸未大三月癸丑小四月壬午大五月壬子
小六月辛巳大七月辛亥小八月庚辰大己亥二
十日九月庚戌小十月己卯大十一月己酉小十
二月戊寅大

十有七年

丙子景王二十年。晉霸頃公去疾元年
○蔡平五○曹平三○衛靈十○鄭定五

○陳惠五○杞平十一○宋元七○齊景
二十三年○蔡哀十二○楚平四○吳僚二

春

小邾子來朝

夏

六月

甲戌朔日有食之

秋

鄭子來朝

八月

晉荀吳帥師滅陸渾之戎

左傳曰晉侯使屠蒯如周請有事於雒與三塗

甚弘謂劉子曰客容猛非祭也其伐戎乎陸渾氏帥師涉自棘津使祭史先用牲於雒陸渾人弗知師從之遂滅陸渾數之以其貳於楚也陸渾子奔楚其衆奔甘鹿周大獲宣子夢文公攜荀吳而授之陸渾故使掇子帥師獻俘於文宮高氏曰宣三年楚子伐陸渾之戎自是陸渾睦於楚而為中國之害至是荀吳帥師滅之胡氏曰文子之於潞氏士會之於甲氏荀吳之於陸渾戎皆滅之也而林父士會稱人荀吳舉其名氏何哉中外有別陸渾之戎密邇王室而縱之雜處則非尊京師別內外之義也與夫關土服遠以圖疆霸則異矣

冬

有星孛于大辰

左傳曰西及漢申須曰彗所以除舊布新也天事恒象今除於火火

出必布焉諸侯具有火災乎梓慎曰往年吾見之是其微也火出而見今茲火出而章必火入而沃其居火也久矣其與不然乎火出於夏為三月於商為四月於周為五月夏數得天若火作其四國當之在宋衛陳鄭乎宋大辰之虛也陳太暉之虛也鄭祝融之虛也皆火房也星孛及漢漢水祥也衛顓頊之虛也故為帝丘其星為大水水火之牡也其以丙子若壬午作乎水火所以合也若火入而伏必以壬午不過其見之月鄭裨竈言於子產曰宋衛陳鄭將同曰火襄陵許氏曰星孛大辰火災應之天地之符也大辰明堂當宋之分故王室亂宋亦亂衛陳鄭災氣所溢也衛亂君奔陳敗婦獲唯鄭有令政而無後災是知禍福之可轉也

楚人及吳戰于長岸

杜氏曰長岸楚地張氏曰水戰也左傳曰吳伐楚陽句為

令尹卜戰不吉司馬子魚曰我得上流何故不吉且楚故司馬令龜我請改卜令曰鮪也以其屬死之楚師繼之尚大克之吉戰於長岸大敗吳師獲其乘舟餘皇使隨人與後至者守之環而塹之及泉盈其隧炭陳以待命吳公子光請於其衆曰袁先王之乘舟豈唯光之罪衆亦有焉請藉取之以救死衆許之使長鬣者三人潛伏於舟側曰我呼餘皇則對師夜從之三呼昏迷對楚人從而殺之楚師亂吳人大敗之取餘皇以歸胡氏曰楚地五千里帶甲數十萬戰勝諸侯威動天下本非吳敵也唯不能去讒賤貨使費無極以讒勝囊瓦以貨行而策士奇材為敵國用故日以侵削至難父之師七國皆敗栢舉之戰國破君奔幾於亡滅吳日益彊而楚削矣

經書月二書日一大衍歷正月戊申小癸酉冬至
二月丁丑大三月丁未小四月丙子大五月丙午
大閏月丙子小六月乙巳大經書六月甲戌朔日
食程氏曰按大衍是年閏五月六月朔乙巳非食
限五月丙午朔日食黃道婁四度太甚甲戌則九
月朔名也而亦不入食限是月也魯太史以為夏
之四月而季平子以為非正陽之月平子必有所
考而言足明食朔之誤也是魯太史之誤也非春
秋之誤也七月乙亥小八月甲辰大九月甲戌
小十月癸卯大十一月癸酉小十二月壬寅大
十有八年丁丑景王二十一年○晉霸頃二○蔡平
六○曹平四年○衛靈十一○鄭定六○
陳惠六○杞平十二○宋元八○齊景二
十四○秦哀十三○楚平五○吳僚三

春

王三月

曹伯須卒

平公也在位四年其子午嗣是為悼公

夏

五月

壬午宋衛陳鄭災

左傳曰火始昏見丙子風梓慎曰是謂融風火之始也七日其

火作乎戊寅風甚壬午大甚宋衛陳鄭皆火梓慎登大庭氏之庫以望之曰宋衛陳鄭也數日皆來告火公羊傳曰記異也同日而俱災為天下記異也劉氏曰四國同日而災非人所能為也其序宋衛陳鄭春秋之正也同德則尚爵同爵則尚親同親則尚齒

六月

邾人入郕

邾音禹。○左傳曰：邾人將閉門，邾人羊羅攝其首焉。遂入。

之盡俘以歸。邾子曰：余無歸矣。從幣於邾。邾莊公反。邾夫人而舍其女杜氏。曰：邾國在琅瑯，開陽縣。

張氏曰：今屬沂州臨沂縣。姁姓國。

秋

葬曹平公

冬

許遷于白羽

左傳曰：楚左尹王子勝言於楚子曰：許於鄭仇敵也，而居楚地，以不禮於

鄭晉鄭方睦鄭若伐許而晉助之楚喪地矣君盍
遷許楚子使王子勝遷許於析實白羽張氏曰白
羽一名析楚邑今鄧州內鄉縣杜氏曰自葉遷也
畏鄭而樂遷故以自遷為文高氏曰許至是三遷
矣

經書月三書日一大行歷正月壬申小戌寅冬至
二月辛丑大三月辛未小四月庚子大五月庚午
小壬午十三日六月己亥大七月己巳小八月戊
戌大九月戊辰小十月丁酉大十一月丁卯小十
二月丙申大長
歷是年閏正月

十有九年

戊寅景王二十二年。晉霸頃三。蔡平
七。曹悼公午元年。衛靈十二。鄭定

七。陳惠七。杞平十三。宋元九。齊景
二十五。秦哀十四。楚平六。吳僚四

春

宋公伐邾

左傳曰邾夫人宋向戌之女也故向寧請師宋公伐邾圍麇取之乃盡歸邾俘

高氏曰為邾故也天下無霸而宋元於此一正入邾之亂是以春秋錄而進之胡氏曰此所謂聲罪執言之師也故書伐邾而釋其取邑之罪

夏

五月

戊辰許世子止弑其君買

左傳曰許悼公瘞飲太子止之藥卒太子奔晉

張氏曰藥劑之得失決死生於頃刻之間瘞疾未足以死而遽至於大故是許悼公之卒止實殺之

也孟子曰殺人以挺與刃有以異乎曰無以異也進藥而藥殺可
以刃與政有以異乎曰無以異也進藥而藥殺可不謂之弑哉其所以異於商臣蔡般者過與故不同爾蘇氏曰今律過失殺人以贖論過失殺暮尊
臧殺人二等過失殺大父母父母滅殺人一
等而和御藥誤不如法者死蓋春秋之遺意

己卯地震

地道安靜以震為異

秋

齊高發帥師伐莒

左傳曰莒子奔紀鄆使孫書伐之初莒有婦人莒子殺其夫已

為娶婦及老託於紀彭紡焉以度而去之及師至則投諸外或獻諸子占子占使師夜緹而登莒其公懼啓西門而出齊師入紀高氏曰莒不事齊故

冬

葬許悼公

呂氏大圭曰傳例君弑賊不討不書葬此二傳妄為之說也黎曰被弑之君多

不書葬者或彼國方有事變雖葬我畏其亂無使
注會之許悼弑而書葬者蓋變生於內而不及國
欲沒其弑逆之迹具禮葬其父我
有使往故書葬歐陽公論止為弑

經書月一書日二大衍歷正月丙寅大甲申冬至
二月丙申小三月乙丑大四月乙未小五月甲子
大戊辰五日己卯十六日六月甲午小七月癸亥
大八月癸巳小九月壬戌大十月壬辰小十一月
辛酉大十二
月辛卯大

二十年

己卯景王二十三年。晉霸頃四。蔡平八
卒。曹悼二。衛靈十三。鄭定八。陳惠

八〇紀平十四〇宗元十〇齊景二十
六〇秦哀十五〇楚平七〇吳僚五

春

王正月

夏

曹公孫會自鄆出奔宋

鄆莫公切穀作夢。高氏曰會者公子喜時之子喜

時者子臧也鄆其采邑也杜氏曰鄆曹邑張氏曰今興仁府乘氏縣大有饗城古老云古鄆城也劉氏曰奔未有言自者此其言自鄆何自鄆待故也犬夫有罪待放於境三年君賜之環則復賜之玦則去春秋之時臣能專其邑無不畔其國者能使其眾無不要其君者臧武仲之智猶據以求為後

於魯是以孔子譏之公孫會之自
鄭奔宋也其賢於臧武仲遠矣

秋

盜殺衛侯之兄縶

縶張立切公殺作輒。左傳曰
衛公孟縶押齊豹奪之司寇與

鄆有役則反之無則取之公孟惡北宮喜褚師圃
欲去之公子朝通於襄夫人宣姜懼而欲以作亂
故齊豹北宮喜褚師圃公子朝作亂初齊豹見宗
魯於公孟為驂乘焉將作亂而謂之曰公孟之不
善子所知也勿與乘吾將殺之對曰吾由子事公
孟子假吾名焉故不吾遠也雖其不善吾亦知之
抑以利故不能去是吾過也今聞難而逃是階子
也子行事乎吾將死之以周事子而歸死於公孟
其可也衛侯在平壽公孟有事於蓋獲之門外齊
子氏惟於門外而伏甲焉使祝鼫寘戈於車薪以

當門使一乘從公孟以出使華齊御公孟宗魯駟
乘及閭中齊氏用戈擊公孟宗魯以背蔽之斷肱
以中公孟之肩皆殺之公聞亂乘驅自閭門入慶
比御公公南楚駟乘使華寅乘貳車及公宮鴻駟
駟駟乘于公公載實以出褚師子申遇公於馬路
之衢遂從過齊氏使華寅肉袒執蓋以當其閭齊
氏射公中南楚之背公遂出寅閉郭門踰而從公
公如死烏折朱鉏宵從竄出徒行從公齊氏之宰
渠子召北宮子北宮氏之宰不與聞謀殺渠子遂
伐齊氏滅之公入與北宮喜盟於彭水之上遂盟
國人公子朝褚師圉子玉霄子高魴出奔晉孫氏
曰以衛侯之母兄盜得殺之衛侯之無刑政也張
氏曰衛襄公二子長曰縶次曰元孟縶之足不良
於是立其弟元為太子襄公卒元立舜之親愛其
弟也富貴之而使吏治其國不得有為以暴其民
靈公受國於有疾之兄聽其無禮於大夫且俾之

預於政而又不能正其母以預制其禍亂使齊豹
北宮喜褚師圃公子朝之倫如盜賊竊發兄死身
危幾亡其國任公輔曰討止齊豹公孫翩陽虎皆
大夫非卿故曰盜澄按此說非也凡稱盜蓋皆賤
者但當稱人以其所作不義故不稱人而
稱盜陸氏曰稱盜者目罪人之賤者也

冬

十月

宋華亥向寧華定出奔陳

向寧公作向甯後同○
左傳曰宋元公無信多

私而惡華向華定華亥與向寧謀曰亡愈於死先
諸華亥僞有疾以誘羣公子殺公子寅公子御戎
公子朱公子固公孫援公孫丁拘向勝向行於其
康公如華氏請焉弗許遂劫之取太子樂與母弟

辰公子地以為質公亦取華亥之子無感向寧之子羅華定之子啓與華氏盟以為質公請於華費遂將攻華氏曰子死有命余不忍其誦殺華向之質而攻之華向奔陳華登奔吳向寧欲殺太子華亥曰干君而出又殺其子其誰納我且歸之有庸使少司寇輕以歸

十有一月

辛卯蔡侯廬卒

平公也在位八年其子朱嗣隱太子有之子東國以世嫡之故攻朱

而自立是為悼公

經書月三書日一大衍歷正月辛酉小己丑冬至按左傳謂二月己丑日南至三統歷謂正月己丑朔旦冬至皆氣同而朔差二月庚寅大閏月庚申小三月己丑大四月己未小五月戊子大六月戊

午小七月丁亥大八月丁巳小九月丙戌大十月
丙辰小十一月乙酉大辛卯七日十二月乙卯小

長歷是年

閏八月

二十有一年

庚辰景王二十四年○晉霸頃五○蔡
悼侯東國元年○曹悼三○衛靈十四

○鄭定九○陳惠九○杞平十五○宋元十一○
齊景二十七○秦哀十六○楚平八○吳僚六

春

王三月

葬蔡平公

夏

晉侯使士鞅來聘

左傳曰叔孫婼為政季孫欲惡諸晉使有司以齊鮑國歸費之

禮為士鞅士鞅怒曰鮑國之位下其國小而使鞅從其牢禮是卑敝邑也將復諸寡君魯人恐加四牢焉為十一牢杜氏曰晉頃公即位通嗣君也高氏曰晉頃公即位六年公以晉昭見止之故不復往朝今使士鞅來聘而賓客牢禮不以命數二十有三年晉侯遂執婼

宋華亥向寧華定自陳入于宋南里以叛

畔○公作

傳曰宋華費遂生華貍華多僚華登貍為少司馬多僚為御士與貍相惡乃譖諸公曰貍將納亡人公懼使告司馬司馬歎曰必多僚也吾有讒子而弗能殺吾又不死抑君有命可若何乃與公謀逐華貍子皮殺多僚却司馬以叛而召亡人華向入樂大心豈慝華貍禦諸橫華氏居廬門以南里叛

宗城舊鄘及桑林之門而守之華登以吳師救華氏齊師宋師敗吳師於鴻口華登帥其餘以敗宋師公欲出尉人濮曰吾小人不藉死而不能送亡君請待之齊烏枝鳴曰用少莫如齊致死齊致死莫如去備彼多兵矣請皆用劍從之華氏北復即之遂敗華氏於新里公子城以晉師至曹翰胡會晉荀吳齊苑何忌衛公子朝救宋與華氏戰於赭丘大敗華氏圍諸南里楚蓬越帥師逆華氏胡氏曰凡書叛有入於戚者而不言衛有入於朝歌者而不言晉有入於蕭者而不言宋比獨稱宗南里何也戚與朝歌及蕭皆其所食邑也若南里則宗國城內之里名也傳稱華氏居廬門南里以叛宗城舊墉及桑林之門以守是華氏與宋分國而居矣故其出其入皆以南里繫之宗此叛臣逼脅其君已甚之詞也

秋

七月

壬午朔日有食之

八月

乙亥叔輒卒

輒公作痙○此叔
弓之子伯張也

冬

蔡侯東□出奔楚

東左公並作朱今從穀梁○穀
梁傳曰東者東國也王父誘而

殺馬父執而用焉澄按東下闕國字前年東平公
卒而東國立至此年冬而奔楚或是國人黨平公

之下或是恐楚之討已然無事迹可考不可知也
左氏事迹不可信按是年蔡侯東出奔楚二十三
年蔡侯東國卒於楚當是一人不應作朱蓋篆文
日在木中為東一在木中為朱此經當是蔡侯東
國穀既脫一國字左公二家又因篆
文日漫為一遂誤東為朱今正之

公如晉至河乃復

左傳曰穀叛晉晉將伐鮮虞故
辭公澄按公朝晉至是凡六矣

而不見納者四積弱
積輕是以屢辱也

經書月三書日二大衍歷正月乙卯小己亥冬至
二月戊申大三月戊寅小四月丁未大乙丑十九
日五月丁丑小六月丙午大七月丙子小八月乙
己大九月乙亥大十月乙巳小閏月甲戌大十一
月甲辰小十二月癸酉大
朔日食黃道箕四度半彊

二十有二年

年乙景王二十五年崩。晉霸項六。蔡悼二。曹悼四。衛靈十五。鄭定。

十。陳惠十。杞平十六。宋元十二。齊景二十八。秦哀十七。楚平九。吳僚七。

春

齊侯伐莒

左傳曰齊北郭啓帥師伐莒莒子將戰苑羊牧之諫曰不如下之大國不可怒

也弗聽敗齊師於壽餘齊侯伐莒莒子行成莒於是乎大惡其君高氏曰齊景矜而自功如此安能及遠哉

宋華亥向寧華定自宋南里出奔楚

左傳曰楚蘧越使告於宋

曰聞君有不令之臣為君憂寡君請受而戮之諸侯之成謀曰若華氏知困而致死楚恥無功而疾

戰非吾利也不如出之以為楚功其亦無能為也已乃固請出之宋人從之宗華亥向寧華定華軀華登皇奄傷省臧士平出奔楚胡氏曰華向誘殺羣公子又劫其君取太子毋弟為質又求助於吳楚蠻夷入披其國都以叛此必誅不赦之賊也宗宜竭力必討之於內諸侯宜協心必救之於外楚子宜執叛臣之使而我之於境今楚人釋君而臣是助諸侯之戍怠於救患固請逸賊而宋人又從之其曰自宗南里者譏宗之縱釋有罪不能致討也

大蒐于昌間

問公作姦○胡氏曰昭公之時凡三書蒐或以非其時或以非其地大意

在權臣專行公不與也高氏曰三家卒徒益眾於蒐加大字所以甚三家之盛見公室之卑也

夏

四月

乙丑天王崩

左傳曰王子朝賓起有寵於景王王與賓孟說之欲立之王田北山使公

卿皆從將殺單子劉子王有心疾崩於榮錡氏單子攻賓起殺之

六月

叔鞅如京師

葬景王

高氏曰天子崩天下諸侯九夷八蠻莫不奔其喪故七月而葬者盡天下臣子之心

使遠近得會其葬也今天王崩諸侯無一奔喪者昭公但使叔鞅往會之又以三月而葬是天子而用士庶人之禮也

王室亂

左傳曰王子朝因舊官百工之喪職秩者與靈景之族以作亂逐劉子劉子奔揚單

子逆悼王子莊宮以歸王子還夜取王以如莊宮單子出王子還奉王以逃單子單子殺還姑發弱驍延定稠子朝奔京伐之京人奔山劉子入於王城鞏簡公敗績於京甘平公亦敗焉叔鞅至自京師言王室之亂也高氏曰春秋記事必指其實下書王猛子朝之事自足以見王室之亂而聖人乃於此不隱其辭何哉此前王室衰微猶未至於亂也故聖人每扶而尊之言王則曰天王不混稱於吳楚也言周則曰京師不下同於列國也王敗於鄭而曰蔡人衛人陳人從王伐鄭以諸侯不可敵王故明君臣之大義也王與戎戰而書王師敗績於茅戎以茅戎不可敵王故以自敗為文也以至襄王出奔而書天王出居於鄭晉侯召王而書天王狩於河陽王臣雖微者亦序於諸侯之上則所

以嚴其名分者至矣故凡王室可譏可貶者皆遷就其辭而為之隱避今景王不能正其家而致諸子之爭立於是尹氏召伯毛伯欲立王子朝而劉子單子欲立王猛二子相爭遂以干戈相向迭勝迭負五年之間國無定主王室之亂莫此為甚故特書之然莊二十年惠王有子頽之亂僖二十四年襄王有子帶之亂春秋不書王室亂何獨於此乎書惠襄二王亂不在己今景王之亂乃自取之是王室自亂盖有甚於惠襄者

劉子單子以王猛居于皇

左傳曰單子欲告急于晉以王如平時速如圓

車次子皇劉子如劉單子使王子處守於王城盟百工於平宮鄆胙伐皇大敗獲鄆胙焚諸王城之市司徒醜以王師敗績於前城百工叛伐單子之宮敗焉反伐之伐東國杜氏曰河南鞏縣西南有

皇亭張氏曰西北有湟水胡氏曰猛未逾年何以稱王示當立也既當立矣何以稱名明嗣君也曰王猛者見居尊得正又以別乎諸王子也按左氏景王太子壽以昭十五年卒至是八年矣猛與句皆其母弟當立然久而未立者王愛庶子朝欲立以為嗣未果而王崩故諸大臣競立君諸王子爭欲立以正則有猛以寵則有朝猛雖正而無寵其威不足以懾羣下朝雖寵而不正其分不足以正人心二子廢立皆恃大臣彊弱而後定也

秋

劉子單子以王猛入于王城

左傳曰晉籍談荀躒帥九州之戎及諸侯

溫原之師以納王於王城單子劉蜜以王師敗績於邨前城人敗陸渾于社高氏曰王城天子都而

子朝之黨在焉故言入杜氏曰王城邾鄆今河南縣張氏曰河南縣乃周書洛誥所謂澗水東渚水西為定鼎之地平王東遷即都於此而春秋所謂京師皆指此也

冬

十月

王子猛卒

左傳曰不成喪也敬王即位館於子旅氏晉籍談荀躒賈辛司馬督帥師軍于

陰于侯氏于谿泉次子社王師軍子汜于解次于任人晉箕遺樂微右行詭濟師取前城軍其東南王師軍於京楚伐京毀其西南杜氏曰未即位故不言崩謚為悼王高氏曰居喪而稱王者明當嗣也出而書居者如成君也卒而書子猛者蓋生己正其當王故死以未逾年之君書之也立後之法

先立嫡無嫡則立子爾立嫡者以嫡為重故太子
死立嫡孫未有嫡孫則立太子之母弟以母嫡故
也立子則從諸子之長者立之均吾庶子故也今
猛又卒於是又立猛之母弟王子句是為敬王

十有二月

癸酉朔日有食之

經書月四書日二大衍歷正月己卯小己亥冬至
二月戊申大三月戊寅小四月丁未大乙丑十九
日五月丁丑小六月丙午大七月丙子小八月乙
己大九月乙亥大十月乙己小閏月甲戌大十一
月甲辰小十二月癸酉大
朔日食黃道箕四度半彊

二十有三年

壬午敬王元年○晉霸頃七○蔡悼三
卒○曹悼五○衛靈十六○鄭定十一

○陳惠十一年○杞平十七○宋元十三○齊景二十九○秦哀十八○楚平十○吳僚八

春

王正月

叔孫婁如晉

婁勅畧切○左傳曰邾人城翼還將自離姑公孫鉏曰魯將御我欲自武

城還循山而南徐鉏丘弱茅地曰道下遇雨將不出是不歸也遂自離姑武城人塞其前斷其後之木而弗殊邾師過之乃推而蹙之遂取邾師獲鉏弱地邾人愬於晉晉人來討叔孫婁如晉杜氏曰謝取邾師也

癸丑叔鞅卒

叔弓之子叔鞅之弟也

晉人執我行人叔孫婁

左傳曰晉人使與邾大夫生叔孫曰列國之卿當小

國之君固周制也邾又夷也寡君之命介子服回在請使當之不敢廢周制故也乃不果坐韓宣子使邾人聚其衆將以叔孫與之叔孫聞之去衆與兵而朝士彌牟謂韓宣子曰子弗良圖而以叔孫與其讎叔孫必死之魯亡叔孫必亡邾邾君亡國將焉歸子雖悔之何及所謂盟主討違命也若昏相執焉用盟主乃弗與使各居一館士伯聽其辭而愬諸宣子乃昏執之士伯御叔孫從者四人過邾館以如吏先歸邾子士伯曰以芻蕘之難從者之病將館子於都叔孫旦而立期焉乃館諸箕舍子服昭伯於他邑范獻子求貨於叔孫使請冠焉取其冠法而與之兩冠曰盍矣為叔孫故申豐以貨如晉叔孫曰見我吾告女所行貨見而不出吏人之與叔孫居於箕者請其吠狗弗與及將歸殺

而與之食之叔孫所館者雖一日必葺其牆屋去之如始至高氏曰晉人雖以我取郭師為罪而執我行其實則為二十一年士缺來聘以魯為卑已故也

晉人圍郊

左傳曰二師圍郊郭潰晉師在乎陰王師在澤邑王使告問二師還高氏曰

郊王畿之邑不繫之國者天下皆王土也王臣亦無所繫蓋士無二王所以別其於諸侯也春秋諸侯更相侵伐未嘗敢及於周蓋外相攻奪以傾天下之勢其心實無王而外不敢犯王室者懼天下諸侯執言而攻己也此圍郊者子朝在焉故也東萊呂氏曰當是時王必自以為無假於晉師故使之間而晉因此遂還然晉師還而子朝之勢復熾若因郭潰遂取子朝不至如後日之難也

夏

六月

蔡侯東國卒于楚

悼公也在位三年二十一年冬奔楚今年夏卒其弟申立是為

昭公

秋

七月

莒子庚與來奔

左傳曰莒子庚與虐而好劍苟鑄劍必試諸人國人患之又將叛齊

烏存帥國人以逐之庚與將出聞烏存執爰而立於道左懼將止死苑羊牧之曰君過之烏存以力聞可矣何必以弑君成名遂來奔齊人納郊公高氏曰庚與不正而立又不安其國而出奔於魯與

鄭伯突同澄曰
庚與名失國也

戊辰吳敗頓胡沈蔡陳許之師于雞父胡子髡沈

子逞滅獲陳夏齧

雞父穀作雞甫髡苦門切逞公作極穀作盈○左傳曰吳人伐

州來楚遂越帥師及諸侯之師奔命救州來吳人禦諸鍾離子瑕卒楚師贈吳公子光曰諸侯從於楚者衆而皆小國也畏楚而不獲已是以來七國同役而不同心若分師先以犯胡沈與陳必先奔三國敗諸侯之師乃搖心矣諸侯乖亂楚必大奔請先者去備薄威後者敦陳整旅吳子從之戰於雞父吳子以罪人三千先犯胡沈與陳三國爭之吳為三軍以繫於後中軍從王光帥右掩餘帥左吳之罪人或奔或止三國亂吳師擊之三國敗獲胡沈之君及陳大夫舍胡沈之囚使奔許與蔡頓

曰吾君死矣師謀而從之三國奔楚師大奔書曰
胡子髡沈子逞滅獲陳夏鬻君臣之辭也公羊傳
曰君死於位曰滅生得曰獲大夫生死皆曰獲胡
氏曰君死曰滅胡子髡沈子逞是也生得曰獲秦
晉戰於韓原獲晉侯是也大夫生死皆曰獲鄭獲
宗華元生也吳獲陳夏鬻死也高氏曰此見吳之
彊而楚人益弱夫頓胡沈蔡陳許皆楚與國也吳
伐州來楚人帥六國之師以救之於是吳人禦之
盡敗其師于雞父頓胡沈其君自將蔡陳許則大
夫帥師是以其次如此也杜氏曰雞父楚地安豐
縣南有雞備亭張氏曰今屬壽州

天王居于狄泉

左傳曰王子朝入於尹尹圍誘劉
陀殺之單子從阪道劉子從尹道

伐尹單子先至而敗劉子還召伯奭南宮極以成
周人伐尹單子劉子樊齊以王如劉張氏曰狄泉

即僖二十九年翟泉杜氏曰洛陽城內太倉西南池水也時在城外高氏曰猛之母弟始立而遽稱天王者蓋景王崩逾年矣不可曠年無王故稱之且明正也著天下已有王而子朝不可以亂之也

尹氏立王子朝

左傳曰王子朝入於王城次於左巷鄆羅納諸莊宮尹辛敗劉師子

唐文敗諸鄆尹辛取西闈攻蒯蒯潰澄曰此時敬王與朝皆立為王周之大臣各有所從周人亦莫知其孰為正孰為非正夫子書敬王為天王書朝為尹氏立邪正辨矣孫氏曰嗣子有常位不言立立者篡辭高氏曰與衛人立晉同衛人者衆人同欲立之猶且不可今尹氏一己之私而立之以亂周室罪尹氏也尹氏即尹子此稱氏者著其世執國柄也陸氏曰大夫稱氏者唯尹氏武氏崔氏皆譏世卿也時世卿既多不可勝譏因尹氏私赴不以名因齊崔氏出奔因武氏以子代父故特書之

及尹氏立王子朝奔楚皆以世卿亂王室故從而書之讖此數者足以見世卿之惡也

八月

乙未地震

左傳曰南宮極震甚弘謂劉文公曰君其勉之先君之力可濟也周之亡也其

三川震今西王之大臣亦震天棄之矣東王必大克杜氏曰經書地震魯地也周地亦震南宮極震為屋所壓而死子朝在王城故謂西王敬王居狄泉在王城之東故曰東王

冬

公如晉至河有疾乃復

至河下公穀又有公字○左傳曰公為叔孫故如晉

公羊傳曰有疾乃復穀恥也蘇氏曰書有疾言非晉之不受也胡氏曰昭公兩朝於晉而一見止五

如晉而四不得入焉以周公之胄千乘之君執幣
帛修兩君之好而不見納斯可恥矣今此書有疾

乃復殺
恥也

經書月四書日三大衍歷正月癸卯小乙己冬至
癸丑十一日二月壬申大三月壬寅小四月辛未
大五月辛丑小六月庚午大七月庚子大戊辰晦
八月己巳大乙未二十七日九月己亥小十月戊
辰大十一月戊戌
小十二月丁卯大

二十有四年

癸未敬王二年○晉霸項八○蔡昭侯
申元年○曹悼六○衛靈十七○鄭定
十二年○陳惠十二○杞平十八○宋元十四○
齊景三十○秦哀十九○楚平十一○吳僚九

春

王二月

丙戌仲孫獲卒

獲俱縛切。高氏曰：此孟獻子之曾孫孟僖子也。按左傳：初，公如楚。

僖子為介，不能相儀。及楚，又不能答。郊勞，僖子病之，乃講學焉。苟能禮者，從之。及將死也，召其大夫曰：「禮人之幹也，無禮無以立。吾聞將有達者，曰：孔丘，聖人之後也。我若獲沒，必屬說與何忌於夫子而師事之，而學禮焉，以定其位。」故孟獻子何忌、南宮敬叔皆師事仲尼。

姑至自晉

姑，公作叔孫舍。○左傳曰：晉士彌牟逆叔孫于冀，曰：「寡君以為盟主之故，是以

久子不腆，敝邑之禮將致諸從者，使彌牟逆吾子叔孫受禮而歸。」呂氏曰：姑，不言叔孫，前此也。劉原父謂公羊獨言叔孫，似是聖人本意，以為褒之。世儒說經之鑿，皆類此。原父能知他人之鑿而不自

知其
鑿也

夏

五月

乙未朔日有食之

左傳曰梓慎曰將水昭子曰旱也日過分而陽不克克必甚能

無旱乎

秋

八月

大雩

丁酉杞伯郁釐卒

平公也在位十八年
子成嗣是為悼公

冬

吳滅巢

左傳曰楚子為舟師以畧吳疆沈尹戌曰此行也楚必亡邑不撫民而勞之吳不動

而速之吳踵楚而疆場無備邑能無亡乎越大夫胥狎勞王於豫章之內越公子倉歸王乘舟倉及壽夢帥師從王王及圍陽而還吳人踵楚而邊人不備遂滅巢及鍾離而還沈尹戌曰亡郢之始於此在矣王一動而亡二姓之師幾如是而不及郢胡氏曰巢楚之附庸實邑之也書吳入州來著陵楚之漸書吳滅巢著入郢之漸四隣封境之守既不能制則封境震矣四境國都之守既不能保則國都危矣故沈尹戌以此為亡郢之始也

葬杞平公

經書月三書日三大衍歷正月丁酉大庚戌冬至
二月丁卯小丙戌二十日三月丙申大四月丙寅
小五月乙未大朔日食黃道胃四度半彊六月乙
丑小七月甲午大八月甲子小九月癸巳大經八
月丁酉在此月經有日無月十月癸亥小十一月
壬辰大十二月壬戌小

二十有五年

甲申敬王三年○晉霸頃九○蔡昭二
○曹悼七○衛靈十八○鄭定十三○
陳惠十三○杞悼公成元年○宋元十五年○齊
景三十一○秦哀二十○楚平十二○吳僚十

春

叔孫婁如宗

左傳曰宋公享昭子明日宴飲酒樂
語相泣也樂祁佐退而告人曰今茲

君與叔孫其皆死乎吾聞之哀樂而樂哀皆喪心也心之精爽是為魂魄魂魄去之何以能久季公若之姊為小邾夫人生宗元夫人生子以妻季平子昭子如宗聘且逆之公若從謂曹氏勿與魯將逐之曹氏告公公告樂祁樂祁曰與之如是魯君必出政在季氏三世矣魯君喪政四公矣無民而能逞其志者未之有也魯君夫民矣焉得逞其志靖以待命猶可動必憂

夏

叔詣會晉趙鞅宗樂大心衛北宮喜鄭游吉曹人

邾人滕人薛人小邾人于黃父

詣公較作倪後同大心公作世心○

左傳曰謀王室也趙簡子令諸侯之大夫輸王粟具戍人曰明年將納王宗樂大心曰我不輸粟我

於周為客若之何使客晉士伯曰自踐土以來宗
何役之不會而何盟之不同曰同恤王室子焉得
避之子奉君命以會大事而宗背盟無乃不可乎
右師不敢對受牒而退高氏曰自二十二年景王
崩王室亂天王播越在諸侯皆莫奔救四年之後
晉始為此會而諸侯不至但合諸大夫以謀之命
諸大夫具成曰明年將納王夫王室之急如此豈
可坐待明年哉有霸者作如齊桓公盟首止以定
王世子鄭晉文公誅叔帶以入襄王豈不美哉桓
文不作朝猛相競王堂世臣不能明先王一定之
制順非而廢適使頃公而為桓文果至是乎是以
聖人傷王室之亂而又於此著諸侯之無霸也張
氏曰黃父即
黑壤晉地

有鸛鵒來巢

鸛公作鸛。左傳曰書所無也張氏
曰邵子曰天下將治則天地之氣自

北而南天下將亂則天地之氣自南而北禽鳥之類得氣之先者也春秋書六鷁退飛氣使之也鷁鷁不踰濟而至魯豈非氣自南而北之驗哉當此之先楚雖為中國患而齊晉猶足以抑之自此之後晉霸不競吳楚越皆以南服迭主夏盟諸侯歛衽事之馴至大亂則知鷁鷁來巢之祥不特昭公出奔之兆而已

秋

七月

上辛大雩季辛又雩

左傳曰再雩旱甚也啖氏曰季辛不言大承上可知

九月

己亥公孫于齊次于陽州

陽公作揚。左傳曰：初季公鳥娶妻于齊鮑文。

子生甲公鳥死季公亥與公思展與公鳥之臣申夜姑相其室及季妣與襄人擅通而懼乃使其妾扶己以示秦遄之妻曰：公若欲使余余不可而扶余又訴於公甫曰：展與夜姑將要余秦姬以告公之公之與公甫告平子平子拘展於下而執夜姑將殺之公若泣而哀之曰：殺是是殺余也將為之請平子使豎勿納日中不得請有司逆命公之使速殺之故公若怨平子季郈之難鬪季氏介其難郈氏為之金距平子怒益宮於郈氏且讓之故郈昭伯亦怒平子臧昭伯之從弟會為讒於臧氏而逃於季氏臧氏執旗平子怒拘臧氏老將禘于襄公萬者二人其衆萬於季氏臧孫曰：此之謂不能庸先君之廟大夫遂怨平子公若獻弓於公為且與之出射於外而謀去季氏公為告公果公賁公

果公賁使侍人僚祖告公公寢將以戈擊之乃走
公曰執之亦無命也懼而不出數月不見公不怒
又使言公執戈以懼之乃走又使言公曰非小人
之所及也公果自言公以告臧孫臧孫以難告卹
孫卹孫以可勸告子家懿伯懿伯曰讒人以君徼
幸事若不克君受其名不可為也舍民數世以求
克事不可必也且政在焉其難圖也公退之辭曰
臣與聞命矣言若洩臣不獲死乃館於公叔孫昭
子如闕公居於長府伐季氏殺公之於門遂入之
平子登臺而請曰君不察臣之罪使有司討臣以
于戈臣請待於沂上以察罪弗許請囚于費弗許
請以五乘亡弗許子家子曰君其許之政自之出
久矣隱民多取食焉為之徙者衆矣日入慝作弗
可知也衆怒不可蓄也蓄而弗治將蘊蘊蓄民將
生心生心同求將合君必悔之弗聽卹孫曰必殺
之公使卹孫逆孟懿子叔孫氏之司馬驥戾言於

其衆曰若之何莫對又曰我家臣也不敢知國凡有季氏與無於我孰利皆曰無季氏是無叔孫氏也驪戾曰然則救諸帥徒以往陷西北隅以入公徒釋甲執冰而踞遂逐之孟氏使登西北隅以望季氏見叔孫氏之旗以告孟氏執郈昭伯殺之於南門之西遂伐公徒子家子曰諸臣僞劫君者而負罪以出君止意如之事君也不敢不改公曰余不忍也與臧孫如墓謀遂行公孫于齊次于陽州杜氏曰陽州齊魯境上邑未敢直前故次于竟也蘇氏曰次于陽州待命于齊也東萊呂氏曰使叔孫昭伯而在則魯昭公必不至孫也

齊侯唁公子野井

穀梁傳曰弔失國曰唁左傳曰齊侯將唁公於平陰公先至於

野井齊侯曰寡人之罪也使有司待於平陰為近故也齊侯曰自莒疆以西請致千社以待君命寡

人將卽敵賦以從執事唯命是聽君之憂寡人之
憂也公喜子家子曰天祿不再天若胙君以魯足
矣失魯而以千社爲臣誰與之立且齊君無信不
如早之晉弗從公羊傳曰齊侯唁公曰奈何君去
魯國之社稷昭公曰喪人不佞失守魯國之社稷
執事以羞再拜顙慶子家駒曰慶子免君於大難
矣子家子曰臣不佞陷君於大難君不忍加之鉞
鑽賜之以死再拜顙高子執簞食與四脰脯國子
執壺漿曰吾寡君聞君在外餒饗未就敢致糗於
從者昭公曰君不忘吾先君延及喪人錫之以大
禮再拜稽首以社受高子曰有夫不祥君無所辱
大禮昭公蓋祭而不嘗景公曰寡人有不腆先君
之服未之敢服有不腆先君之器未之敢用敢以
請昭公曰喪人不佞失守魯國之社稷執事以羞
敢辱大禮敢辭景公曰寡人有不腆先君之服未
之敢服有不腆先君之器未之敢用敢固以請昭

公曰以吾宗廟之在魯也有先君之服未之能以
服有先君之器未之能以出故國辭景公曰寡人
有不腆先君之服未之敢服有不腆先君之器未
之敢用請以饗乎從者昭公曰喪人其何稱景公
曰執君而無稱昭公於是噉然而哭諸大夫皆哭
既哭以人為舊以幣為席以鞍為几以遇禮相見
孔子曰其禮與其辭足觀矣胡氏曰齊侯來唁其
禮與辭是矣而方伯連帥之職則未修也又豈所
以為禮哉石氏曰齊侯之為禮不誠昭公之為辭
不哀可見矣任氏曰公孫子齊求齊之援也次於
陽州待齊之命也齊侯唁公於野井以唁為名拒
公之適己也昭公微弱季氏盛彊迫脅而出欲求
救拯以齊大國之力伐季氏至易也為君而伐臣
至順也行至易以成至順速若發矇惜乎齊侯不
知為此而亦唯季氏之與野井之唁豈弔失國之
禮乎拒公而已季氏曰野井齊地杜氏曰濟南祝

柯縣東有
野井亭

冬

十月

戊辰叔孫婼卒

左傳曰昭子自闕歸見平子平子

子以遜君成名子孫不忘不亦傷乎將若子何平
子曰苟使意如得改事君所謂生死而肉骨也昭
子從公子齊與公言子家子命適公館者執之公
與昭子言於帷內曰將安果而納公公徒將殺昭
子伏諸道左師展告公公使昭子自鑄歸平子
有異志昭子齊於其寢使祝宗祈死戊辰卒

十有一月

己亥宗公佐卒于曲棘

左傳曰宗元公將為公故如晉卒於曲棘杜氏曰曲

棘宗地陳留外黃縣城中有曲棘里在開封雍丘胡氏曰宗元意如之外舅也不此之顧而求欲納公是以正倫恤患為心而不恤其私親其賢於當時諸侯遠矣澄按元公在位十五年子樂嗣是為

景公

十有二月

齊侯取鄆

公羊傳曰為公取之也杜氏曰取以居公也呂氏曰齊侯不能討季氏而獨取

鄆以處公其無遠畧可知也

經書月五書日三大衍歷正月辛卯大乙卯冬至二月辛酉小三月庚寅大四月庚申大五月庚寅

小六月己未大閏月己丑小七月戊午大八月戊
子小經九月己丑在此月九月丁巳大經十月戊
辰在此月十月丁亥小經十一月己亥在此月十
一月丙辰大十二月丙戌小長歷是年閏十二月
己亥九月十二日戊辰十月十
三日又己亥十一月十三日

二十有六年

乙酉敬王四年○晉霸頃十○蔡昭三
○曹悼八○衛靈十九○鄭定十四○

陳惠十四○杞悼二○宋景公顯曼元年○齊景
三十二○秦哀二十一○楚平十三卒○吳僚十
一

春

王正月

葬宗元公

三月而葬速

三月

公至自齊居于鄆

左傳曰處於鄆言魯地也高郵孫氏曰入魯境故書至猶在外

故書地凡公行反而告廟則書至在外雖不告而書至所以存公也

夏

公圍成

左傳曰齊侯將納公命無受魯貨申豐從女賈以幣錦二兩縛一如瑱適齊師謂子

猶之人高錡能貨子猶為高氏後粟五千庾高錡以錦示子猶子猶欲之錡曰魯人買之百兩一布以道之不通先入幣財子猶受之言於齊侯曰齊人不盡力於魯君者非不能事君也然據有異焉

宋元公為魯君如晉卒於曲棘叔孫昭子求納其君無疾而死不知天之棄魯耶抑魯君有罪於鬼神以及此也君若待於曲棘使羣臣從魯君以下馬若可師有濟也君而繼之茲無敵矣若其無成君無辱焉齊侯從之使公子鉏帥師從公成大夫公孫朝謂平子曰有都以衛國也請我受師許之請納質弗許曰信女足矣告於齊師曰孟氏魯之敝室也用成己甚諸息肩於齊齊師圍成成人伐齊師之飲馬於淄者曰將以厭衆魯成備而後告曰不勝衆師及齊師戰於炊鼻孫氏曰公圍成書者見國內皆叛也胡氏曰不書齊師者景公怵於邪說為義不終故微之也書公圍成則季氏之不臣昭公之不君齊侯之不能修方伯連率之職咸見矣

秋

公會齊侯莒子邾子杞伯盟于鄆陵

左傳曰謀納公也高氏曰

公先國而會諸侯者求入也求入不主晉而主齊齊侯矯為此盟以莒邾杞皆魯之與國也

公至自會居于鄆

九月

庚申楚子居卒

平王也在位十三年子昭王軫嗣

冬

十月

天王入于成周

左傳曰單子如晉告急劉人敗王城之師于尸氏王城人劉人戰於

施谷劉師敗績劉子以王出次於渠王城人焚劉
王宿於褚氏王次於崔谷王入於胥靡王次於滑
晉知躒趙鞅帥師納王使女寬守闕塞王起師於
滑在郊遂次於尸召伯達王于尸及劉子單子盟
遂軍圍澤次於隄上王入於成周晉師使成公般
戍周而還澄按平王東遷都於王城王城者周名
所卜澗水東瀍水西之地一名郊鄆以定九鼎為
朝會諸侯之處是曰東都蓋以鎬京為周之西都
故以此王城為東都東對西而言也在漢為河南
縣成周者周名所卜瀍水東之地以遷殷頑民者
是曰下都蓋以王城為洛之上都故以此成周為
下都下對上而言也在漢為洛陽縣時王子朝據
王城故王入於成周而居及王子朝出奔王畏朝
之餘黨多在王城者故不復歸王城而徙都成周
至赧王初年始復再遷王城以依西周公而居焉
左氏叙事以王入成周在於朝奔楚之後今依經

所書
正之

尹氏召伯毛伯以王子朝奔楚

左傳曰晉師克鞏召伯盈逐王子朝

王子朝及召氏之族毛伯得尹氏固南宮騫奉周之典籍以奔楚劉氏曰召伯盈逐王子朝杜氏云召伯當言召氏經誤非也召伯既逐王子朝而歸敬王矣又何為以子朝奔乎若云召伯當作召氏者則又不與經合且召伯既自歸周則其族亦必隨之何故猶奉子朝為亂乎且召伯尊也召族卑也今召伯不奔召族自出法不當書於經而叙毛伯之上也又不得以尹氏為此尹氏所以書者以有尹固也固尊自得書爾召族無盈則卑卑則何以得書乎胡氏曰景王寵愛子朝踈薄子猛徒殺此心兩棄之也寵華為羣小所宗而人心不附正適為人心所向而羣小不從故伯服雖殺而平王

亦不能復宗周之盛申生已死而卓子奚齊亦不能勝里克之兵是兩棄之也澄按定五年王人殺

子朝

于楚

經書月四書日一大衍歷正月乙卯大庚申冬至

二月乙酉小三月甲寅大四月甲申小五月癸丑

大六月癸未大七月癸丑小八月壬午大九月壬

子小庚申九日十月辛乙大十一月辛亥小十二

月庚

辰大

二十有七年

丙戌敬王五年○晉霸頃十一○蔡昭
四○曹悼九年○衛靈二十○鄭定十

五○陳惠十五○杞悼三○宋景二○齊景三十

三○秦哀二十二○楚昭王幹元年○吳僚十二

弒

春

公如齊

杜氏曰自
鄆行也

公至自齊居于鄆

高氏曰公至自齊居于鄆者二
至自會居于鄆者一至自乾侯

居於鄆者一書至書居不外公也我居故也君播
越於外不得其所而魯國臣子之義可絕乎春秋
之作明
君臣也

夏

四月

吳弑其君僚

左傳曰吳子欲因楚喪而伐之使公
子掩餘公子燭庸帥師圍潛使延州

來季子聘子上國楚芳尹然工尹麋帥師救潛吳師不能退吳公子光曰此時也弗可失也吾鱄設鱄曰我王嗣也吾欲求之光伏甲於堀室而享王鱄設諸寘劍於魚中以進抽劍刺王鉞交於胃遂弑王吳公子掩餘奔徐公子燭庸奔鍾吾公羊傳曰謁也餘祭也夷昧也與季子同母者四人季子弱而才兄弟皆愛之同欲立之以為君謁曰今若是逆而與季子國季子不受也請無與子而與弟弟兄迭為君而致國乎季子皆曰諾故諸為君者皆輕死為勇飲食必祝曰天苟有吳國尚速有悔於予身故謁也死餘祭也立餘祭也死夷昧也立夷昧也死則國宜之季子者也季子使而亡焉僚者長庶也即之季子使而反至而君之爾圉廬曰先君之所以不與子國而與弟者凡為季子故也將從先君之命與則國宜之季子者也如不從先君之命與則我宜立者也僚惡得為君乎於是使

專諸刺僚而致國乎季子季子不受曰爾弑吾君
吾受爾國是吾與爾為篡也爾殺吾兄吾今殺爾
是父子兄弟相殺終身無已也去之延陵終身不
入吳國故君子以其不受為義不殺為仁劉氏曰
稱國以弑者衆弑君之辭也謁餘祭夷昧不與子
國而與弟為季子也季子亡僚長庶即位是廢讓
毀義以篡也國人莫說故衆弑其君也澄按史記
以僚為夷昧之子光為謁之子如此則僚乃光之
兄弟也詳觀僚在位十二年光尊事之故其弑也
乘機而後發竊疑以僚為餘祭之庶弟而扎之庶
兄者近是扎之三兄相傳本欲置國于扎而扎不
受故夷昧之卒也扎避之僚也無知自謂扎不在
則己為扎兄可繼夷昧而立遂即位然季子不受
國則夷昧自當立子而僚取之是篡也國固光之
國也僚烏得而間之國之大臣及臣民
皆欲弑僚而還國於光也故稱國弑

楚殺其大夫郤宛

左傳曰郤宛直而和國人說之

惡之令尹子常賄而信讒無極諧郤宛焉謂子常曰子惡欲飲子酒又謂子惡令尹欲飲酒於子氏子惡曰我賤人也不足以辱令尹令尹將必來辱為患已甚吾無以酬之若何無極曰令尹好甲兵子出之吾擇焉取五甲五兵曰寘諸門令尹至必觀之而從以酬之及饗日惟諸門左無極謂令尹曰吾幾禍子子惡將為子不利甲在門矣子必無往且此役也吳可以得志子惡取賂焉而還又誤羣帥使退其師曰乘亂不祥吳乘我喪我乘其亂不亦可乎令尹使視郤氏則有甲焉不往召鄢將師而告之將師退遂令攻郤氏且燕之子惡聞之遂自殺也國人弗燕令曰不燕郤氏與之同罪或取一編管焉或取一秉杆焉國人投之遂弗燕也令尹炮之盡滅郤氏之族黨殺陽令終與其弟完

秋

及佗與晉陳及其子弟晉陳之族呼於國曰鄢氏費氏自以為王專禍楚國弱寡王室蒙王與令尹以自利也令尹盡信之矣國將如何令尹病之劉氏曰君不明故臣得專其威殺其大夫而莫之止也然而卻宛則有以取之張氏曰恃國人之悅己而無見幾知人之明以立於無道之朝見殺宜矣

晉士鞅宋樂祁犁衛北宮喜曹人邾人滕人會于

扈

左傳曰令戌周且謀納公也宋衛皆利納公固請之范獻子取貨於季孫謂司城子梁與北宮

貞子曰季孫未知其罪而君伐之請囚請亡於是乎不獲君又弗克而自出也夫豈無憐而能出君乎季氏之復天救之也休公徒之怒而啓叔孫氏之心不然豈其伐人而說甲執冰以游叔孫氏懼

禍之濫而自同於季氏天之道也魯君守齊三年而無成季氏甚得其民淮夷與之有十年之隙有齊楚之援有天之贊有民之助有堅守之心有列國之權而弗敢宣也事君如在國故執以為難二子皆國者也而欲納魯君執之願也請從二子以圍魯無成死之二子懼皆辭乃辭小國而以難復

冬

十月

曹伯午卒

悼公也在位九年弟野立是為聲公

邾快來奔

高氏曰快亦是叛人之黨魯為遁逃淵藪而受之魯之疆臣逐君而邾快來奔

從其類也

公如齊

左傳曰齊侯請饗之子家子曰朝夕立於其朝又何饗焉其飲酒也乃飲酒使宰獻

而請安子仲之子曰重為齊侯夫人曰請使重見子家子乃以君出杜氏曰禮君宴大夫使宰為獻主比公於大夫也齊侯請自安不在坐也子仲魯公子慙十二年謀逐季氏不能而奔齊今行飲酒禮而欲使重見從宴媒也

公至自齊居于郕

高氏曰公以齊之卑我遂歸而明年如晉

經書月二書日無大衍歷正月庚戌小兩寅冬至二月己卯大三月己酉小四月戊寅大五月戊申小六月丁丑大七月丁未小八月丙子大九月丙午小十月乙亥大十一月乙巳小十二月甲戌大

二十有八年

丁亥敬王六年○晉霸頃十二○蔡昭五○曹聲公野元年○衛靈二十一○

鄭定公十六卒○陳惠十六○杞悼四○宋景三齊景三十四○秦哀二十三○楚昭二○吳闔廬

光元年

春

王三月

葬曹悼公

公如晉次于乾侯

左傳曰公如晉將如乾侯子家子曰有求於人而即其安人孰

矜之其造於竟弗聽使請逆於晉晉人曰天禍魯國君淹恤在外君亦不使一个辱在寡人而即安

於甥舅其亦使逆君使公復於竟而後逆之孫氏
曰公一年如齊者再皆不見禮故如晉其言次於
乾侯者不得入於晉也公既不見禮於齊又不得
入於晉其窮辱若此呂氏曰公如齊不得入如晉
又不得入當世諸侯如是然後知無霸之害也任
氏曰齊晉大國也皆與季氏不恤昭公中國主盟
所以在夷狄乎杜氏曰乾侯晉竟內邑在魏郡斥
丘縣張氏曰地譜今大名府成安縣東南有斥丘
城故

夏

四月

丙戌鄭伯寧卒

寧公作寧○定公也在位
十九年子蔓嗣是為獻公

六月

葬鄭定公

秋

七月

癸巳滕子寧卒

寧公作寧○悼公也在位二十五年子結嗣是為頃公

冬

葬滕悼公

公不在國凡喪葬之禮皆季氏專之也

經書月四書日二大衍歷正月甲辰大辛未冬至二月甲戌小三月癸卯大閏月癸酉小經四月丙

戊在閏月四月壬寅大五月壬申小六月辛丑大
七月辛未小癸巳二十三日八月庚子大九月庚
午小十月己亥大十一月己酉小十二月
戊戌大長歷是年閏五月丙戌四月四日

二十有九年

戊子敬王七年○晉霸頃十三○蔡昭
六○曹聲二○衛靈二十二○鄭獻公

蔓元年○陳惠十七○杞悼五○宋景四○齊景
三十五○秦哀二十四○楚昭三○吳闔廬二

春

公至自乾侯居于鄆

杜氏曰以乾侯至
不得見晉侯故

齊侯使高張來唁公

左傳曰來唁稱主君子家子
曰齊卑君矣君祗辱焉杜氏

曰高張高偃子唁公至晉不見受襄陵許氏曰荀
躒唁公地高張不地以公居鄆猶以魯志也故稱

來焉高氏曰唁於野并齊地也唁於乾侯
晉地也今在鄆乃魯地故但書來而已

公如晉次于乾侯

齊氏曰齊侯唁公比公於大夫
故公復如晉冀晉見恤也而晉

復不受公故次於乾侯諸侯
出奔狼狽未有如公之甚者

夏

四月

庚子叔詣卒

此叔輒之子也高氏
曰叔詣欲納公而卒

秋

七月

冬

十月

鄆潰

胡氏曰公之出奔處鄆四年民不見德亡無愛徵至於潰散豈非昏迷不返從者又艾殺

其民視如土芥其下不堪所以潰歟高氏曰此齊侯誘之使潰也鄆固畏季氏以齊使公居而不憚今齊不終惠鄆亦叛公昭公居於國國人逐之出君於鄆而鄆潰見魯民皆叛但知畏季氏也

經書月三書日一大衍歷正月戊辰小丙子冬至二月丁酉大三月丁卯大四月丁酉小庚子四日五月丙寅大六月丙申小七月乙丑大八月乙未小九月甲子大十月甲午小十一月癸亥大十二

月癸
己小

三十年

己丑敬王八年○晉霸頃十四卒○蔡昭七
○曹聲三○衛靈二十三○鄭獻二○陳惠

十八○杞悼六○宋景五○齊景三十六
○蔡哀二十五○楚昭四○吳闔廬三

春

王正月

公在乾侯

胡氏曰公去社稷於今五年每歲首月
不書公在魯四封之內則無適而非其

所也至於鄆潰客寄乾侯非其所矣歲首必書公
之所在者蓋以存君不與季氏之專國也劉氏曰
公在外久矣居於鄆有魯也在乾侯無魯也公雖
無魯魯不可以無公向曰居今曰在向也魯而今
也晉一民莫得使焉尺地莫得有焉久固
曰乾侯之君爾春秋則以為猶吾君也

夏

六月

庚辰晉侯去疾卒

頃公也在位二十四年其子午嗣是為定公時公在乾侯晉地

也而不弔其喪者晉不受故也

秋

八月

葬晉頃公

頃音傾○左傳曰鄭游吉弔且送葬魏獻子使士景伯詰之曰悼公之喪子西

弔子蟠送葬今吾子無貳何故對曰先王之制諸侯之喪士弔大夫送葬唯嘉好聘饗三軍之事於

是乎使卿晉之喪事敝邑之間先君有所助執紼
矣若其不問雖士大夫有所不獲數矣靈王之喪
我先君簡公在楚我先大夫印段實往敝邑
之少卿也王吏不討恤所無也晉人不能詰

冬

十有二月

吳滅徐徐子章羽奔楚

羽公作禹○左傳曰吳子使徐人執掩餘使鍾吾人

執燭庸二公子奔楚楚子大封而定其徙使監馬
尹大心逆吳公子使居養焉尹然左司馬沈尹成
城之取於城父與胡田以與之將以害吳也子西
諫曰吳光新得國而親其民視民如子辛苦同之
將用之也若好吳邊疆使柔服焉猶懼其至吾又
疆其讎以重怒之無乃不可乎王弗聽吳子怒執

鍾吾子遂伐徐防山以水之滅徐徐子章羽斷其
髮攜其夫人以逆吳子吳子唁而送之使其通臣
從之遂奔楚楚沈尹戌帥師救徐弗及遂城夷使
徐子處之吳子問於伍員曰初而言伐楚余知其
可也而恐其使余往也又惡人之有余之功也今
余將自有之矣伐楚何如對曰楚執政衆而乖莫
適任患若為三師以肆焉一師至彼必皆出彼出
則歸彼歸則出楚必道敝亟肄以罷之多方以誤
之既罷而後以三軍繼之必大
克之闔廬從之楚於是乎始病

經書月四書日一大衍歷正月壬戌大辛己冬至
二月壬辰小三月辛酉大四月辛卯小五月庚申
大經六月庚辰在此月六月庚寅小七月己未大
八月己丑大九月己未小十月戊子大十一月戊
午小十二月丁亥大閏月丁己小長
歷是年閏五月庚辰六月二十二日

三十有一年

庚寅敬王九年○晉霸定公午元年○
蔡昭公○曹聲公○衛靈公二十四○鄭

獻三○陳惠十九○杞悼七○宋景六○齊景
三十七○秦哀二十六○楚昭五○吳閻廬四

春

王正月

公在乾侯

左傳曰言不能內外也高氏曰鄆曰居
者鄆魯地公所有乾侯曰在者乾侯晉

地非公得而專也春秋凡言居者境內之辭天王
出居於鄭之類是也言在者境外之辭公在楚之

類是也

季孫意如會晉荀躒于適歷

躒力狄切公作禚適
丁歷切○左傳曰晉

侯將以師納公范獻子曰若召季孫而不來則信
不臣矣然後伐之若何晉人召季孫獻子使私焉
曰子必來我受其無咎季孫意如會晉荀躒于適
歷荀躒曰寡君使躒謂吾子何故出君有君不事
周有常刑子其圖之季孫練冠麻衣跣行伏而對
曰事君臣之所得也敢逃刑命君若以臣為有
罪請囚於費以待君之察也亦唯君若以先臣之
故不絕季氏而賜之死若弗殺弗亡君之惠也死
且不朽若得從君而歸則固臣之願也敢有異心
胡氏曰意如出君不事專有魯國晉實主盟不能
致討而寵以會禮不亦逆哉季孫行貨齊晉使不
納公禱於煬宮求君不入齊晉不能誅亂禁姦悖
君臣之義不知其從自及也呂氏曰晉為盟主以
號令諸侯將以託國者也而使大夫與叛臣會荀
躒奉命而行不能諫止其為臣
亦可知也林氏曰適歷晉地

夏

四月

丁巳薛伯穀卒

入春秋唯莊三十一年書薛伯卒及此年書名

晉侯使荀躒唁公子乾侯

左傳曰季孫從知伯如乾侯子家子曰君與之

歸一慙之不忍而終身慙乎公曰諾衆曰在一言矣君必逐之荀躒以晉侯之命唁公且曰寡君使躒以君命討於意如意如不敢逃死君其入也公曰君惠顧先君之好施及亡人將使歸糞除宗祧以事君則不能見夫人己所能見夫人者有如河荀躒掩耳而走曰寡君其罪之恐敢與知魯國之難臣請復於寡君退而謂季孫君怒未怠子姑歸祭子家子曰君以一乘入於魯師季孫必與君歸

公欲從之衆從者齊公不得歸穀梁傳曰唁公不
得入於魯也陸氏曰在晉地故不言來呂氏曰齊
唁唁公於野井晉侯使荀躒唁公於乾侯言大國
盟主皆不能討亂無助順向正之意也高氏曰荀
躒既會季孫於適歷復以晉侯之命唁公於乾侯
蓋晉侯有不納公之言夫不恤見逐之君而信不
臣者之言陰交其臣陽唁其君空言無實卒使
六卿之彊遂分晉國而有之則晉侯亦魯侯已

秋

葬薛獻公

高氏曰季氏恐失鄰國
之歡故使人會其喪葬

冬

□黑肱以濫來奔

肱公作弓○黑肱上脫邾字杜
氏曰不書邾史闕文濫東海昌

應縣襄陵許氏曰郭快黑肱相
繼來奔季孫當國以類至也

十有二月

辛亥朔日有食之

經書月三書日二大衍歷正月丙戌大丁亥冬至
二月丙辰小三月乙酉大四月乙卯小丁巳三日
五月甲申大六月甲寅小七月癸未大八月癸丑
小九月壬午大十月壬子大十一月壬午小十二
月辛亥大朔日食黃
道尾十二度半彊

三十有二年

辛卯敬王十年○晉霸定二○蔡昭九
○曹聲五○衛靈二十五○鄭獻四○

陳惠二十○杞悼八○宋景七○齊景三十
八○秦哀二十七○楚昭六○吳闔廬五

春

王正月

公在乾侯

取闕

闕口暫切。杜氏曰：闕，魯邑。公別居乾侯，遣人誘闕而取之，不用師徒。張氏曰：昭公之難，

叔孫如闕，定元年季孫使役如闕，公氏將溝焉。此魯地而公取之也。澄曰：昭公為魯國之君，四封之內皆其土地也。今昭公為季氏所逐而書取鄆，取闕以見季氏據國，公無尺土矣。雖得魯邑猶取之於外云爾。

夏

吳伐越

左傳曰始用師於越也高氏曰前此越與楚伐吳故吳於是年代越

秋

七月

冬

仲孫何忌會晉韓不信齊高張宋仲幾衛世叔申

鄭國參曹人莒人薛人杞人小邾人城成周

世叔殺作

太叔○左傳曰王使富辛與石張如晉請城成周天子曰天降禍於周俾我兄弟並有亂心以為伯父憂我一二親昵甥舅不違啓處於今十年勤戍五年余一人無日忘之閔閔焉如農夫之望歲懼

以待時伯父若肆大惠復二文之業弛周室之憂
微文武之福以固盟主宣昭令名則余一人有大
願矣昔成王合諸侯城成周以為東都崇文德焉
今我欲歆福假靈於成王脩成周之城俾戍人無
勤諸侯用寧登賊遠屏晉之力也其委諸伯父使
伯父實重圖之俾我一人無徵怨於百姓而伯父
有榮施先王庸之范獻子謂魏獻子曰與其戍周
不如城之天子甯云雖有後事晉勿與知可也從
王命以紓諸侯晉國無憂是之不務而又焉從事
魏獻子曰善使伯音對曰天子有命敢不奉承以
奔告於諸侯遲速衰序於是焉在士彌牟營成周
計丈數揣高卑度厚薄仞溝洫物土方議遠邇量
事期計徒庸慮材用書餼糧以令役於諸侯屬役
賦文書以授帥而效諸劉子韓簡子臨之以為成
命澄曰王城自平王東遷以來天子世世居之故
其城完固子朝揚居王城敬王居狄泉晉師納王

然後王入於成周子朝遂棄王城而奔楚子朝雖已出奔王畏子朝餘黨尚多故不敢歸王城而留居成周成周乃周公遷殷頑民之地其城圯惡故諸侯以兵戍之至此晉率諸侯城成周之後始撤諸侯之戍呂氏曰周室雖微諸侯猶勤之如此先王之德澤猶有存焉者也

十有二月

己未公薨于乾侯

左傳曰言失其所也趙簡子問於史墨曰季氏出其君而民服

焉諸侯與之君死於外而莫之或罪也對曰天生季氏以貳魯侯為日久矣民忘君矣雖死於外其誰矜之社稷無常奉君臣無常位自古以然三后之姓於今為庶主所知也成季友桓之季也受費以為上卿至於文子武子政在季氏於此君也四公矣民不知君何以得國是以為君慎器與名不

可以假人胡氏曰諸侯失國出奔者多矣昭公在外八年終以客死為天下笑何也祭仲雖專而世權不重於季氏衛侯失國猶夫人也而有推挽之者所以雖失而復得也魯自季友至於意如專執國命四世矣其臣皆季氏之孚也其民皆季氏之獲也昭公有一子家駒言不見聽計不行也不能

復國
宜矣

經書月三書日一天衍歷正月辛巳小壬辰冬至二月庚戌大三月庚辰小四月己酉大五月己卯小於月戊申大七月戊寅小八月丁未大九月丁丑小十月丙午大十一月丙子小十二月乙巳大己未十
五日

春秋纂言卷十